

MELEKISEDEKÈ EWU NGANYÌ?



Twinyikàayi mitù yètù bwà disambila.

Taatù wa mu Dyulu munanga, tudi tuumvwa musambu ewu wà *Itàbùùjà Nàka*, cìdi cìtùfikisha ku dimanya ne ki cyònsò cìdi cìkèngelà bwà twètù kwenza bwà kupyàna ònsò wà ku milayi yà Nzambi, ànu kuyiitabuuja cyanààna. Bwalu bààkafùnda ne: “Bintu byònsò bìdi mwà kwenzeka bwà aba bàdi bìitabuuja.” Patùdi twela mbilà apa, bu muntu uvwa ne mwànà wa ciseki awu ne: “Mukalenge, ndi ngiitabuuja! Nkwàcishèku bwà bupidyà bwànyi.”

² Tudi tuKwela twasàkidila bwà bukolè Bwèbè bunène, dibuulula Dyèbè dinène dyà Wèwè mwinè kutùdi mu matùkù à ndekeelu aa. Cìdi cyènza ne mwoyi wètù wùtambè kwikala ne disànka mûle ntèntè ne disànka, bwà kumanya ne tudi babwelè mu dipetangana ne Nzambi udi ne mwoyi; Udi uwùshindikila buludì ku bijaadiki byà mu mubidi, byà kulenga ne byanza, bu mwàkenzàYe mu matùkù àkaadi mapite awu, ne mwàkalayàYe bwà ditùkù edi amu. Tudi ne kusàkidila kwàbùngì Kùdi, Nzambi wetù. Ditùkù edi dyà mifitù didì muntu nànsha umwe kàyì ùmwèka bu udi mumanyè njila wa kuya, tudi ne disànka dyà kupeta mwaba wà dikùbiibwa, cinyeemenu.

³ Mpindyewu tùbènèshèku dilòòlò edi, Mukalenge, patùdi twakula bwà Dìyi Dyèbè apa. Ne milayi yidi mitùpèebwe, twamòna mwa kuyidiisha mu myoyi yètù, kuyèngeleka ne kaneemu kàbùngì, ne kuyitùmikila ne dikàzamuna dyà difwànà dyà Nzambi. Bwalu tudi tulòmba nùnkù mu Dìnà dyà Yesù. Amen.

⁴ [Mwanèètù wa balùme kampàndà ùdi wàkula ne Mwanèètù Branham—Muf.] (Kaa, kabìvwa bikèngela kwikalabò benzè to. Mulàmbù wà dinanga? Kabìvwa bikèngela kwikalabò benzè aci to. Kabìvwa bikèngela kwikalabò benzè aci to. Udi mwenzè nànkù awu nganyi? Udi ki udi mupiiile bwa aci anyi?) Mvwa mbùündula mulongolodi wa ndongamu. Udi wàmba ne ùvwa munsangishile mulàmbù wà dinanga. Kabìvwa bikèngela bwà kwikalayè mwenzè nànkù to. Ndi ngwànyisha, Nzambi mmumanyè, kàdi ncìtu—ncìtu ngiya bwà aci nànsha. Twasàkidilaayi. Mukalenge ànùbènèshè. Nèngènzè ne mwànyì mwònsò. Nèngùtèèkè ànu mu midimu yà bwambi yà kùbaabèndè, nèmmanyè nànkù ne newùye bwà Bukalenge bwà Nzambi. Nènku bu Mukalenge mwà kwanyisha, nènkawùfikishe, mèmè mwinè, ku matùnga awu, bwà kutwàla Èvànjeeliyò umweumwe unùdi basòmba, munkaci mwà kutèeleja lumingu elu ewu, dībā adi ndi mumanyè

ne necyènjiibwè mu mùshindù wunùdi baMwitàbùùje awu. Mukalenge ànkwàcishèku bwà kucyènza.

⁵ Ndi ne kusàkidila kwàbùngi bwà bùngi bùdi bantu balwè mu lumingu elu, ne bwà nwènù bônso bàdi baswikàkàne dilòlò edì ku—ku nshinga yà tèlefonè. Nènku tudi tusàkidila muntu ne muntu wa kunùdi.

⁶ Billy mmungambile mu dindà emu, wàmba ne: “Papa, bu wèwè mwà kwikala mulwè naanyi mu dindà emu, kumpàlà kwà dîbà, ànu páfumu bufuku ku dicyà apu, ne kwimana pambèlu apa mu nyungulukilu wa myaba eyi ne kubandila mùdi baamaamù bààmushila bàna bààbò bàà mu mabòko munda mwà màshinyi, bantu bakwate ne byà luse abu basòmbe mu mvùla amu, bindile bwà biibi byùnzulukè!” Nudi numòna ne ndi mwà kwikala mwena lubombo wà bishi mèmè munwambile cintu cidì kaciyi Bulelèlà? Ndi mufwànyine kwikala bulelèlà muntu mubi. Míngà misangu bikèngela ntapanganè ku mwoyi, kàdi kî mbwalu nè ndi muswè kucyènza to, mbwalu. . . Kî mmèmè udi utàpangana ku mwoyi to. Bulelèlà ke bùdi bùtápangana ku mwoyi abu. Kàdi ndi—ndi. . . Kàdi ndi ngiitabuuja ne ki bwà cinyi nudi nulwa, bwalu ndi neenù ne meeji matòòke à ngàmba kufwà, ne ndi ngèza cyònsò cìndi mwà kwenza aci bwà kunùkwàcisha. Mukalenge àkwacishaku muntu ne muntu wa kunùdi.

⁷ Nènku mpindyewu ndi muswè bwà kusàkidila bantu bwà dyelangana dyàbò dyà dibòko dilenga, bantu bàà mu cimenga eci, kàbidi, bàdi batùpèeshe, batwitabile bwà kufucila nzubu wa cilongelu ewu, dibàlaasà edì ne cibambalu cyà manàyi eci. Kàbidi ndi muswè kusàkidila balombodi ní nudi mwab’ewu. Ne kàbidi ndi muswè kusàkidila Thurston Colvin, udi mukùbi wa bintu mwab’ewu, bwà ditwèla dyèndè dyà dibòko dilenga mu ditwàmbulwisha bwà kupeta mwab’ewu ne kwikala neetù dilòlò dyònsò.

⁸ Tudi tusàkidila baampùlushi bàà mu Jeffersonville bwà dilwa kutùkùba mwab’ewu, ku mushinga wà citèkù menemene. Ndi ngèèla meeji ne nku ndola mitwè ku yìbidi ku dîbà dìmwè, kùdìbo bateèkèle baampùlushi mwab’ewu bwà mudimu wà pabwàwò, bwà kulonga màshinyi pa myaba, bwà kumòna ne kakwikadikù. . . cintu nànsha cimwè kacýenzeki to, ne bintu byònsò bivwa ànu bîmpè. Tudi tusàkidila bantu bwà cyòci aci. Ne kùdi ba—ba, kàbidi, maanyimèlà mwab’ewu ku—ku mbòdi, mvwa mumumòne’s. Ne bônso bàdi baswikakane nè cyòci eci, ncyà bushùwà ne tudi tunùsàkidila.

⁹ Ndi nsàkidila muntu ne muntu wa kunùdi bwà mapà. Billy mmuntwadile, mu mapingaja emu, di—dipà kampànda, àbùngi àà kùdiwu, ne tushèètè, mbòmbò, ne bikwàbò. Ne dìmwè dyà ku wòwù dìvwa ma—Masànka, ne fòtò wa Kilistò mwenzelamù, ciinè aci ne Dyiisha dyà pa Mukùnà. Ne ncyà bushùwà ne

bìwwa bilenga be. Ncyà bushùwà ne ndi nkwèla twasàkidila. Ne bintu byàbùngì be, ncyèna mumanyè mwà kunùsàkidila bwà bwalu bwàbì to. Pashìishe, kàbìdì, bwà ditùla—ditùla dyènù dyà mfranga, ditùula dyà lupetu bwà masangisha, tudì bushùwà twanyisha cyòci aci menemene, ne mwoyi wètù mujimà. Mukalenge àbeneshèku yònsò wa kunùdì, mu mùshindù mubanjiike.

¹⁰ Billy mmwambè ne, kùvwa bantu bààbùngì, nwènù bàvwa bàlòmba miyìiki yà bàbìdì yà pàà nkààyetù mu cikondo aci. Ne bààbùngì bàvwa balòmba ne bàvwa ne bàna bàà mu mabòko bàà kulàmbula. Kaa, mùshindù mwinè wùndì muswè kwenza cyòci aci's wè!

Kàdi, nudi numòna's, pàndì ndwa ewu musangu, mbyà lùkàsàlùkàsà. Bikèngela bwà mèmè kushààla ànu, dìbà dyònsò, ndonga Dìyì edì mu disambila, bwà ditwàla dyà Mayiisha aa. Nwamònu's, òwò kaèna. . . Àdì—àdì à pabwàwù kutùdì, bwalu mbwà kupeta diswa dyà Nzambì kàdi pashìishe kwakula bintu ebi. Ne byònsò abi bidì ne cyà kutwilangana pàmwè, ne kukonka Nzambì ne ncyèpi cyà kukàngula.

¹¹ Mpindyewu, bu Mukalenge mwà kwanyisha, netwàlukilè cyàkàbìdì àbìdì àdì panshì aa, patùdì ànu ne twàpeci ditùkù. Mvwa mwambe bwa—bwalu kampànda, anyì—anyì mwambe cintu kampànda pa bidì bitàngilà Paasàkà. Mbìmpè nkenkete aci, bwalu ndi ngèla meeji ne ndi ne ndongamu mu California mu ciinè cikondo aci. Pa nàнку aci cidì mwà kwikala kaciyì mu cyòci to. Nànsha nàнку, patùdì twalukila cyàkàbìdì ku tabernacle, netùkutùminè kartà, nènku èkèleeziyà, ne—ne kunùpèèsha di—ditùkù dyà ngondo ne dìbà. Pashìishe nèngiikalè, pàmwàpa pa diine dìbà adi, cyàkàbìdì. . .

¹² Ncyèna mwanji kufila dìbà ku disambidila dyà babèèdì to. Katwena banji kwenza disangisha nànsha dìmwè dyà kutwàla bantu ne kubàsambidila to. Tudì ànu tujikija ne tubàlekela bàya. Nènku bàna bèètù aba bàvwa munkaci mwà kuyiisha, Mwanèètù Lee Vayle ne Mwanèètù. . . Bàna bèètù bakwàbò aba bàvwa munkaci mwà kuyiisha, ne kusambidila babèèdì, ne bènza dibàtiiza dyà mu màyi, bàbàtiiza's, èyowà, ne bàndekela nshààla nkààyanì ne Dìyì. Tudì twela bantu aba twasàkidila. Mbenze mudimu wa bukìtù.

¹³ Kùdì balundà bààbùngì kaaba aka bàndì muswè kutwilangana naabò. Ndi ntuma mèsù lwà panshi apa mmòna John ne Earl. Ne Docteur Lee Vayle nyeyè wàwa, umwe wa ku balombodi bàà kàpanyè abu. Mwanèètù Roy Borders. Bantu abu, ncyèna nànsha mupetè. . . Ncyèna nànsha mubàlabùleku ku cyanza cyanààna to. Nciwaku mupetè mpungà to. Ndi mvùluka balundà bàanyì bàà ku Kentucky, ne mu nyùngulukilu emu, ne bambi naanyì, mùshindù mwine ùndì njinga kubàlabulakù ku cyanza's wè! Mwanèètù Blair, mvwa mumumòne kaaba

aka ditùkù adi. Ne bààbúngì bàà ku bantu abu bándì—bándì munange, ne bàkaadi babwelè mu masangisha kabùkabù, kàdi ncyenàku nànsha mene mwânjì kubàlabula ku cyanza to. Ndi—ndi nteeta. . . Kì nnè mbwalu ncyèna muswe kwenza nàнку to; mbwalu ncyèna ne díbà dyà kucyenza to, kàdi ndi ànu mu dilwijakaja.

¹⁴ Dilàmbula dyà bânà bàà mu mabòkò, bushùwà's. Mwanàànyì mulela wa balùme, mwikùlwànyì wa balùme ùvwa ne cyà kulàmbudiibwa mu masangisha aa. Ncyenà mwanjì kupeta díbà dyà kucyenza to; David mwànà ewu. Ndi kaakù, misangu yìbìdì mpindyewu. Pa nàнку, Mukalenge May, yèyè kaaba aka dilòlò edì, uvwa mumpèeshe dikombo awu, mbyenze ànu bu ne nebikèngele bwà mèmè kukwàta naadi mudimu ànu àbìdì àdì panshì aa.

¹⁵ Pa nàнку, ki mèmè kwambila Billy, mèmè kwamba ne: “Bible mmwámbe cyà bushùwà ne ‘vulàngànàayi ne nùujè buloba,’ kàdi bujitu bònsò abu kabùvwa bukwmikila wèwè to.” Nènku biikùlù aba bàdì bàlwa ne lùkàsà be.

Nàнку awu, vùlukàayi ne, mukàj'a-mwanàànyì ewu ùvwa nkumba, twamb'eku twamb'eku. Kàvwa mwà kulelakù bânà nànsha. Kàdi dīngà ditùkù, ngùmukila mu disangisha, Mukalenge kwakulaYè naanyì kwamba ne: “Loyce, wèwè's nèulele mwànà wa balùme. Mukalenge mmukubènèshe. Dìsaamà dyèbè dyà bânà bakàjì adi dyàmanyì kuya.” Paul mwànà awu wàkalediibwa, paanyimà pàà ngondo citèemà.

¹⁶ Ngondo yìbìdì kumpàla kwà mwànà ewu kubwelayè mu cyalu, mvwa musòmbe, nkùpula bufùkù mukana dīndà kampànda, ku mèèsà, nènku Loyce ne Billy bàvwa basòmbe dyàmwàmwà dyà mèèsà bantàngile. Kì mèmè kumòna Loyce wàmusha mwànà wa mu dibòko mwikàle ne kambùlankètè kàà rose. . . to kàà bleu kamujingila. Nènku Billy ùvwa musòmbe mu ditumba, munkaci mwà kudiisha Paul mwànà. Mèmè kwamba ne: “Billy, ndi mfùma ku dimòna cikèènà-kumòna. Loyce ùvwa munkaci mwà kwamusha mwànà wa mu dibòko mu mbùlankète wa bleu.”

Yèyè ne: “Kì lwendu lwànyì lwà bulembi lùyaayà alu's. Cìdì ànu ngondo citèemà cyanànà kuumukila ku mpindyewu.”

Paanyimà pàà ngondo dikumi ne umwe, David mwànà awu kulediibwayè. Kàdi ncivwa mukùmbàne bwà kumulàmbula kùdì Mukalenge to, ncyàkumulàmbula to ànu patwàlukila cyàkàbìdì. Pa nàнку nwamònu cìdì bwalu's.

¹⁷ Mùshindù mwinè wùndì munangè bantu ne bwobùmwe bwàbò's wè! Kàdi bânà bèètù bàvwa munkaci mwà kusambidila babèèdì, ne mèmè ndi mumanyè ne mbituute dyàkalenga. Dilòlò dyònsò tuvwa tusambidila babèèdì, umwe ùtentekela mukwàbò byanza, twètù bònsò cyàpàmwe, mwinè mùshindù awu cìdì cibàkula citùpà cyònsò nkòong. Kàdi pàmwàpa, bu

Nzambi mwà kwanyisha . . . Nèncifilè pa kartà, twètù bakàtùme. Pàndi ngàlukila, ndi muswè kulàmbula matùkù matwè ku àbidi anyi àsàtù, cyàkàbìdì, ànu bwà kusambidila babèèdì cyanàànà ne kwenza citùdì mwà kwenza mu mùshindù awu. Mpindyewu, ne ndi nsàkidila bantu bwà dikwacisha dyàbò, cyàkàbìdì.

¹⁸ Mpindyewu ndi muswè ànu kwela nsèke, katanci kakesè cyanàànà, pa—pa Diyiisha dyà mu dindà edi. Kakùyì mpatà to, ncìvwa ànu mudijikije to, kàdi ndi ngèèla meeji ne nudi bumvwè. Ne ndi mutwìshìibwe ne kanwèna. . . Kanwàdyàkumanyakù cìvwà ciinè aci ciyile bwà mèmè kwenza to.

¹⁹ Mpindyewu, mbimwènèke ànu bu bipwekèle bwènù nwènù. Kàdi, udi, udi umòna cyùdì wenza aci anyi? Udi wangata kaaba kàà Nzambi, bwà kujikula Cintu kampànda. Nènku kumpàla kwà mèmè kwenza nànkù, bìvwa bikèngela kùlwe dyandamuna dyà kùdì Nzambi. Nènku byàkakèngela bwà Yèyè kupweka, ne Yèyè kuDìleeja patòòke, ne kufila Dibuulula. Kì bwà cinyi, nwamònu's, eci cìdì bwà Èkèleeziyà. Nènku vùlukààyi ne, mèmè kwamba ne: "Ebi, bìndì mwàmbè ebi, bìvwa ànu bwà Èkèleeziyà nkààyendè."

²⁰ Nènku mbwà nwàmònakù mwà kwikala ne dyeyemena ne kumanya ne, awu ùvwa Nzambi umweumwe awu wàkangambila kuulu kwàka kùvwà kakùyì nshìndì nànsha ne: "Akùlà, ne wambe mwaba wìkalàyi." Nènku misangu yìsàtù milondàngane kwenzekaci. Mpindyewu, pùikalàYe mwà kufùka ku Dìyi òmwèdìmwè adì cintu kampànda cìdì kaciyìku to, ambàayaaku tũng mwàbèngà Cyòci eci kukwàta bikolè ku Dìtùkù dyà Cilumbulwidi! Nwamònu anyi? Bantu bàvwakù bwà kumòna bintu ebi, ne kumanya. Bu mwàkambà Pòlò, mu matùkù àkaadi mapite awu's. Kùvwa bantu nendè, bàà—bààkùmvwa buloba bùkanka, kàdi kabàyi buumvwe dīyi to, kàdi bàà—bààkamòna Dìkunji dyà—dyà Kapyà.

²¹ Ncingenzèle bìmpè, nànsha nànkù, paanyimà pàà cimanè kujika, bwà kumòna balùme ne bakàjì, bāndì mumanyè ne mbeena Kìlistò bashùwashùwàlà, buupùkilangàna muntu ne mukwèndè bàdila mwadi.

²² Nènku tèèlejāāyi, nwènù balundà bàānyì, Nzambi ùdì ùshìndika Dìyi Dyèndè ne bimanyinu ne bishìndiki, bwà kujaadika ne Dyòdì ndyà cyà bushùwà, Dīyi dyakula. Mpindyewu vùlukàāyi ne, Bukènkè bùvwà mu Dìtutu adi abu, bwàkafilà Dibuulula. . .

Mvwa. . . Mwanāānyì mukesè wa bakàjì ùvwa ùngambila, Sarah ewu, ne pāvwbò. . . Cìlongelu aci cyà mu Arizona mwāmwa cìvwa cìtàngila muulu mwāmwa mùvwà kamùyì mavuba amu, ne kumònabò Dìtutu didì dikèmesha edi ku mukùnà awu, dibànda dīpweka, ne Mudilu wà kàlaabi mutwìle ùteema munda Mwādì. Mulongeshi kutangalajayè balongi ne cìlongelu, e kubàpātulayè pambèlu lwà kumpàla, e kwambayè

ne: “Nukàvwakù kacya bamòne cintu cyà mùshindù wàwa anyi? Tàngilàayi mùshindù ùdici kuntwaku.”

Vùlukàayi ne, aci m’Bukênkè bùmwebùmwebè bwà kàlaabi butwile abu bùdi pa lubwebwe. Pa nànkù n’Nzambì umweumwe awu, Dibuuulula òmwèòmwè òdi, mmwámbe ne: “Bámбилè bwà kwenza *cikampànda*.” Ke cìmvwà munwámбилè mu dindà emu, pa nànkù’s ke Cyòci aci.

²³ Byòbi byenzèke ne mulundà wanyì mwìmpè, Mwanèètù Roy Roberson, ùdi munkaci mwà kutèeleja ku Tucson. Roy, udi muvùlùke, ditùkù òdi, cìkèèná-kumòna cyùwàkamòná patùvwà biimàne pa mukùnà apu anyi? Wèwè kuseemena kùndì, ne Ditutu òdi òvwà ku lusongo aku? Kulwa wenda upweka, wèwè ùdi mumanyè cyàkawkambilàYe; nènku s’mwà mukwambilàci kumbèlu aku, ditùkù òdi’s? Ki cyòci aci’s, Roy. Kùtàcishi kàbìdi meeji to, mwanàànyì wa balùme. Kwajiki.

²⁴ Kwèna ànu mumanyè cìdìci cyùmvwija to! Nngàsà. Yèyè mmukunangè. Ne wèwè udi muMunange, uMukwacile mudimu ne kudipwekesha kwònsò ne uMukuukwile matùkù èbè ònsò. Ikàlà ne disànka, tùngunukà wèwè ànu ne kwikala ne nsòmbelu ànu wùdi nendè awu. Pawìkalà ne disànka, tùngunukà mùshindù awu. Kwìkadikù wenza kàbìdi cintu cibi nànsha cìmvwè to, mùshindù awu. Tùngunukà wèwè ànu ne kuya. Ngàsà wa Nzambì.

²⁵ Mpìndyewu ndi muswè kusambila cyàkàbìdi kumpàlà kwà twètù kubwela mu Dìyì. Mbanganyi bànsambidile? Ndi ànu ngùmuka ku disangisha nya ku disangisha. Nenùnsambileku anyi?

Nudi bamanye’s, ndi muswè kunwìmbila kaamusambu kakesè, twètù bònsò cyapamwe, kumpàlà kwà twètù kuya ku Dìyì. Ànu bwà . . . bwà twamòna mwà kumanya ne Nzambì. . . Ànu kaadilàmbula kakesè cyanààna. Nukààdikù bumvwè kaamusambu kakesè aka, *Yèyè Ùdi Ùkucyùka* anyi? “Pa muunya ne tunynganyinga, Yèyè ùdi ùkucyùka.”

²⁶ Inàbànzà mutekète awu nyèwù ùlwa ku cisanji cyà pyànò. Twámbe ne, ndi muswè kwela pèndè inàbànzà mutekète ewu twasàkidila. Ncìvwa nànsha mumanyè ne yèyè ùvwa nganyi to. Ngumwe wa ku bàná bàà bakàjì bàà mulami ewu ewu. Ncyà bushùwà ne ndi . . .mwànà mukèsè wa bakàjì wa Mwanèètù Wheeler. Mmulèpè mpìndyewu. Ùvwa kaacintu kakesè menemene kàvwà kasòmba pa cinù cyànyì, ànu àbìdi àdi panshì aa, kàdi patùdi twakulangana apa ùkaadi mukàjì wa citende. Pa nànkù ndi mmusàkidila menemene bwà mudiyè mukwàta mudimu ne dimanya dyèndè dyà mùjiki, nènku mpìndyewu ùdi wimba byà kalolò be. Udikù mwà kutùpèèsha cyonà anyi, mwanèètù wa bakàjì? Twètù bònsò pàmwebè mpìndyewu.

Ùdi ùkucyùka,

Ûdi ùkucyùka;
Pa muunyà anyi mu dilèjì,
Ûdi ùkucyùka.

Nudi banangè aci anyi? Tùwĩmbàayi cyàkàbìdì, bõnsò pàmwè.

Ûdi ùkucyùka,
Ûdi ùkucyùka;
Pa muunyà anyi mu dilèjì,
Ûdi ùkucyùka.

Mwanèètù Dauch, Yéyè ùdi ùkucyùka, wèwè pèèbè, Mwanèètù. Kwènàku muMunangè anyi?

Twĩnyikàayi mitù yètù mpindyewu.

²⁷ Taatù Munanga wa Ngàsà, ne kabèji aka kakesè kafùnda tuntu tukesè twàkwambila bantu mwab'ewu, nènku ngàalukila cyàkàbìdì bwà kwoshakù dísù mu dindà emu, bwalu's aci ke cidi bantu balwìlè bwà kutèèleja. Ndi ndòmba, Nzambi, bwà Ûlekelè bantu bà mòna ne Nzambi ùtu munangè ne ùcyùka. Ne kacivwa mmémè wákafila Cyôci aci to, Mukalenge, civwa cishindikìibwe ne civwa m'Bulelèlè. Pa nàнку ndi ndòmba, Nzambi Munanga, bwà dinanga Dyèbè dyàshààla misangu yònsò ànu munkaci mwà bantu. Dilòòlò edi, bikèngela tùtapulukè paanyimà pàà disangisha edi ne tuye ku mbànzà yètù mishiilèshìilàngàne, bìdì—bìdì bu bìdì bitùkòka, ndambù, mu ndòndò, Mukalenge. Ndi ndòmba bwà Wèwè kubènèshakù bantu aba.

²⁸ Mpindyewu patùdi tuseemena ku Dìyì apa, mu disambila, ne tuseemena ku Dìyì difùnda apa, tudi tulòmba bwà Wèwè kwangata Dìyì difùnda edi ne kuDìvwija ne mwoyi kutùdi dilòòlò edi. Nènku patùumukà mu nzùbu ewu dilòòlò edi bwà kutàpuluka ne kwalukila ku mbànzà yètù mishiilèshìilàngàne, swàku bwà twàmbè mùvwà bàvwà bàfuminà ku Èmawùsè abu, bàvwà bendè Nendè ditùkù dijimà kàdi kabàyi ànu baMumanyè to; kàdi pàkabàbwejàYè munda mwà cibambalu amu dilòòlò adi, ne biibi byònsò bikànga, Wàkenza cintu kampànda ànu mwàkenzàYe kumpàlà kwà dipoopediibwa Dyèndè dyà pa nkùrusè amu. Ku cyôci aci, bàakamanya ne Yéyè ùvwa mubiike ku lufù.

Enzàku nàнку cyàkàbìdì dilòòlò edi, Mukalenge. Enzàku nàнку, pàdi biibi bikàngiibwe apa, ne kasùmbù Kèèbè kakesè nkòkò aka kasòmbe apa, kindile. Nènku, Taatù, patwàyà ku mbànzà yètù, netwàmbè mwàkambàbo amu ne: “Myoyi yètù kayivwa yilàkuka kapyà munda mwètù pàvwàYe wàkula neetù mu njila apu anyi!” Tudi tudilàmbula twètù biinè, ne bõnsò, mu byanza Byèbè, Mukalenge. Enzà neetù mùdi Wèwè mumòne ne mbikùmbànàngàne amu. Mu Dìnà dyà Yesù. Amen.

²⁹ Mpindyewu túbwelàayi buludi mu mudimu mpindyewu, lùkàsàlùkàsà. Buulùlaayi mpindyewu pàmwè naanyi, bu nwènù

mwà kuswà, ku Mukàndà wà Ebèlù, ne dibuulula dikwàbò pa Mukenji. Netwàkulè ànu bwà katançi kakesè cyanààna dilòlò edi, bu Mukalenge mwà kwanyisha. Ne pashiishe patùdi tubala mvensà yisàtù yà kumpàlà yà Ebèlù 7.1 too ne ku 3, ne pashiishe kwela nsèke pa cyòci eci. Ne katwèna bamanyè cyènzà Mukalenge to; katwèna bamanyè to. Cintu cimwèpelè citùdi twenza ng' ànu kwitabuuja, kwikala batàbàla, kusambila. Ncyà bushùwà anyi? Ne kwitabuuja ne “Yèyè neenzè bwà bintu byònsò bikwacishanganè bwà dyàkalenga dyà bàdi baMunangè,” bwalu Yèyè mmulayè bwà kucyènzà.

Bwalu Melekisedekè ewu, mfùmù wa Salèmà, mwakwidi wa Nzambi mutàmbe bunène wa mu dyulu, wàkatwìlangana ne Abraham pàvwàye wàlukila ùfùmina ku dishebeya dyà bamfùmù, ne kumubènesshayè;

Uwua kàbìdi Abraham mupèeshè cyàdiikùmì cyà byònsò; dyàmbedi mwikàle ku dyumvwija Mfùmù wa bwakànè, ne paanyimà pàà cyòci aci Mfùmù wa Salèmà, mbwena kwamba ne, Mfùmù wa ditalala;

Tùyaayibi kule ndambù ne dibala.

Kàyì taatù, kàyì maamù, kàyì bankambwà, . . . anyi ntwàdijilu wa matùkù, anyi ndekeelu wa muoyi; kàdi muvwijìbwe mufwànàngàne ne Mwànà wa Nzambi; mushààle mwakwidi kacya ànu byàtùngunuka.

³⁰ Elàayi meeji ku Mupèsonà munène ewu, pa mùshindù mwinè wùdi Muntu ewu ne cyà kwikala munène's wè! Nènku mpindyewu, lukonko lùdi ne: “Muntu ewu Nganyì?” Beena tèlòlòjì mbapetè mmwènu mishiilàngàne. Kàdi kacya ànu ku dikàngudiibwa dyà Bitampì mwandamutekète, Mukànda ùvwà kawùyì ùmvwika ùvwà musokoka kutùdi awu. . . Bilondèshile Bwàkabuulwibwà 10.1 too ne ku 7, maalu masokoka ónsò adi mafùnda mu Mukàndà ewu, àvwà masokoka mu cikondo cyònsò cyà balongolodi, àdi ne cyà kupàtudiibwa patòòke kùdi mwanjèlò wa cikondo cyà ndekeelu cyà èkèleeziyà. Mbanganyì bàdi bamanyè ne aci ncyà bushùwà? Ncyà bushùwà, bìdi ne cyà kutwàdiibwa. Maalu masokoka ónsò à Mukàndà ùdi kawùyì wùmvwika awu àdi ne cyà kubuuludiibwa kùdi mùsànjeela wa Laòdikìyà wa cikondo aci.

³¹ Pa kumòna ne kùdi dikòkangana dyàbúngì pa bìdi bitàngila Mupèsonà ewu ne cyena-bwalu eci, ndi ngèèla meeji ne mbilààle kutùdi bwà twètù kudibwinkamù, bwà kujandula ne ewu Nganyì's. Mpindyewu, kùdi ngeelèlù yà meeji búngì cyanààna pa Yèyè.

Umwe wa ku ngeelèlù wa meeji, ùdi wàmba ne: “Yèyè ùdi ànu bwalu bukwàtakaja cyanààna. Yèyè kàvwa bushùwà muntu to.”

Ne bakwàbò abu bàdi bàmba, ne: “Cìvwa mbwakwidi. Cìvwa mbwakwidi bwà Melekisedekè.” Ki mmwènenu udikù mutàmbe kwikala pèpì ne bulelèla, udi mukwàtaku ku lwàlwa luseke kupita udibò nenda ku lukwàbò, mbwalu bàdi bàmba ne cìvwa mbwakwidi.

Kacyèna mwà kwikala aci to, bwalu mu mvensà mwi4 Ùdi wàmba ne Yèyè ùvwa Mupèrsonà, “Muntu.” Pa nàнку, bwà kwikalaye Mupèrsonà kampànda, bikèngela Yèyè ikale ne buumùntù, “Muntu.” Kabiyi mulongo kampànda to; kàdi Mupèrsonà! Pa nàнку Yèyè kàvwa ànu mulongo wa bwakwidi cyanaàna to, anyi Yèyè kàvwa bwalu bukwàtakaja nànsha. Ùvwa Mupèrsonà.

³² Ne Mupèrsonà awu ngwà Cyendèlèlèlè. Bu nwènù mwà kumòna: “Kàvwa ne taatù to. Kàvwa ne maamù to. Kàvwa ne díbà òvwaYe mubangèkù to. Ne Yèyè kàvwakù ne díbà òvwaYe mushùikile to.” Ne nànsha mwikàle Nganyì ùcìdi ànu ne mwoyi dilòòlò edi, bwalu Bible mmwàmbè mwab’ewu ne: “Yèyè kàvwa ní nnè taatù, ní nnè maamù, ní nnè ntwàdijilu wa matùkù, anyi ndekeelu wa mwoyi to.” Pa nàнку bivwa bikèngela kwikalaYe Mupèrsonà wà Cyendèlèlèlè. Mmwómò anyi? Mupèrsonà wà Cyendèlèlèlè! Pa nàнку ncifwànyine kwikala ànu Mupèrsonà umwèpelè, awu’s n’Nzambi, bwalu Yèyè ke Umwèpelè udi wa Cyendèlèlèlè. Nzambi’s!

³³ Mpindyewu, mu Timotè wa Kumpàla 6.15 ne 16, panwikalà baswè kubala cyòci aci musangu kampànda, ndi muswè bwà nwènù kucibala.

Mpindyewu, pàndi mwimanyina, mpa ne, Yèyè ùvwa Nzambi, bwalu Yèyè ke Mupèrsonà ùmwèpelè udi kàyì mwà kufwà to. Nènku mpindyewu, Nzambi uDishintulula mu Muntu; ke cìvwaYe ncyòci aci: “Kàyì taatù, kàyì maamù, kàyì ntwàdijilu wa mwoyi, kàyì ndekeelu wa matùkù.”

³⁴ Mpindyewu tudi tusangana mu Mifundu ne bantu bààbùngì bàtu bàlongesha ne: “bantu bàsàtù mu Bunzambi.” Pa nàнку, kwèna mwà kwikala ne buumùntù kùyì muntu to. Bidi bikèngela kwikala muntu bwà kwikalakù buumùntù.

Mwambi kampànda wa ba-Baptistes, kùkaadi ndambù wa mbingu, kulwayè, kwànyì kumbèlu, wàmba ne: “Ndi muswè kukwololakù pa bìdi bitàngila Bunzambi kupmàl’eku wèwè mupeta díbà.” Ùvwa mumbiikila’s, wè.

³⁵ Mémè ne: “Ndi ne díbà mpindyewu mene, bwalu ndi muswè kwikala mwolòlòdìibwe, ne tudi tuteeka ku luseke bikwàbò byònsò, bwà kucyènzà.”

Ki kulwayè, kwambayè ne: “Mwanèètù Branham, udi ulongesha ne kùdi Nzambi ànu ùmwèpelè.”

Mémè ne: “Èyowà’s, mukalenge.”

Yêyè kwamba ne: “Èè,” yêyè ne, “mémè ndi ngiitabuuja ne kùdi Nzambi umwèpelè, kàdi Nzambi umwèpelè mu BaaPèrsònà bàsàtù.”

Mémè ne: “Mukalenge, ambùlùlaku aci cyàkàbìdì.”

Yêyè kwamba ne: “Nzambi umwe, mu BaaPèrsònà bàsàtù.”

³⁶ Mémè ne: “Wèwè ewu utu mulongèla penyi?” Nwamònu anyi? Ki kungambilayè cilongelu cyà—cyà tùlaasà tutùmbùke twà Bible. Mémè ne: “Ndi mufwànyine kwitabuuja aci. Wèwè kwèna mwà kwikala muntu kùyì mwikàle ne buumùntù nànsha. Nènku wèwè mwikàle buumùntù, udi buumùntù kampànda abu bwèbè wèwè mwinè. Udi muntu nkààya, mutàpùlùke.”

Ki yêyè kwamba ne: “Èè, beena tèlòlòjì kabèènakù nànsha mwà kuumvwija aci to.”

Mémè ne: “Bìdi ku dibuulula.”

Ki yêyè ne: “Ncyèna mwà kwitaba dibuulula to.”

³⁷ Mémè ne: “Nènku kakwèna mùshindù wa Nzambi kufikayè kùdi to, bwalu: ‘Ncisokoka ku mèsù kwà beena lungenyi ne batàlame, kàdi cibuuwila bânà bakesè,’ cibuuwila, dibuulula, ‘cibuuwila bânà bakesè bu aba bàdì mwà kuciitaba, kulonga.’” Ki mémè kwamba ne: “Kakùvwa kufwànyine kwikala mùshindù nànsha ùmwè wà Nzambi kufikayè kùdi to; wèwè nkàyeebè udi udikàngila njila wa kufika kùdiYe.”

Bible mujimà ùdi dibuulula dyà Nzambi. Èkèleeziyà mujimà mmwibakila pa dibuulula dyà Nzambi. Kakwèna mungà mùshindù wa kumanya Nzambi to, ànu ku dibuulula. “Kùdi ewu udi Mwànà muswè kuMubuulwila awu.” Dibuuulula; byònsò bìdi dibuulula. Pa nànkù, bwà kwita-. . . bwà kubenga kwitaba dibuulula, dîbà adi wèwè udi ànu mwena tèlòlòjì wa mukwàte mashika, ne kakwènakù ditèkemena bwèbè wèwè to.

³⁸ Mpindyewu, mpindyewu, tudi tusangana ne Mupèrsònà ewu “kàvwa ne taatù, kàvwa ne maamù, ní nnè ntwàdijilu wa matùkù anyi ndekeelu wa mwoyi.” Ùvwa n’Nzambi, *didyàlula*.

Mpindyewu, mwà—mwàkù ùdi ùlwa, mwàkù wà cyena Ngèlika, ùdi ùmvwija ne: “kushintuluka,” ùvwàbo bakwàte naawù mudimu, ùDishintuluka, *didyàlula*, kuumuka ku Muntu umwèpelè kuya ku. . .muntu umwèpelè, mwàkù wà mu cyena Ngèlikà mwaba awu, *didyàlula*, ùdi uùmvwija. . . ùvwa mwangàcila mu manàyi, pàvwà muntu umwe ùshintulula bwàdì, bwà kumuvwija muntu kampànda mukwàbò.

³⁹ Bu mùdì mu—mu tùlaasà, ànu àbìdì àdì panshì aa, Ngèela meeji ne, Rebekah, pabwìpì menemene ne kujikija kàlaasà, bàvwa ne òmwè dyà ku manàyi à Shakespeare awu. Nènku byàkakèngela bwà nsongààlùmè kampànda àshintululè bilàmbà byèndè misangu ne misangu, bwalu wàkanàya bitùpà bibìdì anyi bisàtù bishiilàngàne; kàdi, muntu umweumwe awu. Kupàtukayè, musangu kampànda, ùvwa muntu mubi; kàdi

pààkapàtukàye musangu wàkalondà, ùvwa muntu mukwàbò. Nènku mpindyewu mwàkù wa cyena Ngèlikà, *en morphe*, ùdi ùswa kwamba ne yèyè “mmushintùlùle bwâdi bwèndè bwà kwisù.”

⁴⁰ Nènku’s ke cyàkenzà Nzambi ncyôci aci. N’Nzambi umweumwe awu dîbà dyônsò. Nzambi mu mmwènekèlu wa Taatù, N—Nyuma, Dikunji dyà Kapyà. Nzambi umweumwe awu wàkavwijiibwa mubidi ne wàkasòmbela munkaci mwètù, *didyàlula*, wàkapàtukila patòòke bwà Wàmòna mwà kumwènèka. Nènku mpindyewu Nzambi umweumwe awu n’Nyumà Mwîmpè. Taatù, Mwânà, Wacijila...kaciyi Nzambi yisàtù to; midimu yisàtù, byenzedi bisàtù byà Nzambi umwèpelè awu.

⁴¹ Bible mmwambè ne: “Kùdi Nzambi umwèpelè,” kî n’yisàtù to. Kàdi’s ke mùshindù ùvwàbo kabàyì mwà...Kwèna mwà kwolola eci kàdi kupàtulamù Nzambi yisàtù to. Kwèna mufwànyinekù kusùmbisha mwena Yudà aci to. Bwà aci ndi nkwambila. Ewu udi mumanyè cidi cîmpè, mmumanyè ne kùdi Nzambi ànu umwèpelè.

⁴² Mònaayi ne, ànu mùdi disonga dyà lupingù amu, yèyè mmusokòke, ne—ne bwâdi bwà kwisù kwàlù. Ke cidi Nzambi mwenzèle eci cikondo. Ncisokoka. Bintu byònsò ebi bivwa bisokoka, ne bidì ne cyà kubuuludiibwa mu cikondo eci. Mpindyewu, Bible ùdi wàmba ne nebìbuuludiibwè mu bikondo byà ndekeelu. Ncyenzè ànu mùdi musongi wa mpingù ùlama cintu cyèndè—cyèndè cidiye mwenzè cibwikila too ne dîbà dyùmushàye bwâdi abu ki cyôci aci pwàà.

Nènku cyôci aci ke cyàkadì Bible. Ùvwa mudimu wà Nzambi mubwikila. Ne Ùvwa musokoka kacya ku cibangidilu cyà bufùki, mbwalu busokoka bwà mvungilu mwandamutekète. Ne Nzambi mmulayè mu ditùkù edi, mu cikondo eci cyà èkèleeziyà wa Laòdikiyà, Ùvwa mwà kuumusha bwâdi pa cintu cyònsò mu kaabujimà ne twètù bafwànyine kuCimòna. Cintu kaayi cyà butùmbi’s wè!

⁴³ Nzambi, *ùdyàlula*, mubwikila bwâdi mu Dikunji dyà Kapyà. Nzambi, *ùdyàlula*, mu Muntu wàkabiikidiibwa ne Yesù. Nzambi, *ùdyàlula*, mu Èkèleeziyà Wèndè. Nzambi kumutù kwètù, Nzambi neetù, Nzambi munda mwètù; didikèèpesha dyà Nzambi.

Muulu mwàmwa, wa cijila, muntu nànsha umwe kàvwakù mwà kuMulenga to; Yèyè wàkasòmba pa mukùnà, ne nànsha nyama yèyè ànu mudidinge mulengè ku mukùnà aku, bivwa bikèngela kufwàye.

Ki pashiishe Nzambi kutùulukayè ne kushintulula ntentà Wèndè, ne kupwekaYè bwà kusòmba neetù, kulwa umwe wetù. “Ne twètù kuMulenga,” mùdi Bible mwàmbè. Timotè wa Kumpàla 3.16: “Kakùyì dikokangana to bwalu

busokoka bwà difwàna dyà Nzambi mbunène; bwalu Nzambi wàkamwèneshiibwa mu mubidi, mulengùibwe ne byanza.” Nzambi ùdya munyìinyi. Nzambi ùnwa mâyi. Nzambi ùlààla. Nzambi ùdila. Ùvwa umwe wetù. Mulenga, mufwànyikijùibwe mu Bible!

Awu ùvwa n’Nzambi kumutù kwètù; Nzambi neetù; mpindyewu n’Nzambi munda mwètù, Nyumà Mwimpè awu. Kàyì Mupèrsonà mwisâtù to; Mupèrsonà ùmwèùmwe awu’s!

⁴⁴ Nzambi wàkatùùluka ne kulwa mubidi, ne wàkafwà lufù, mu Kilstò; bwà Wàmòna mwà kukezula Èkèleeziyà, bwà kubwelaMù, bwà bwobùmwe. Nzambi ùtu munangè bwobùmwe. Ki cyàkenzelà Yè muntu ku ntwàdijilu ncyôci aci, civwa mbwà bwobùmwe; Nzambi ùvwa musòmba nkààyendè, ne Bakèlùbà.

⁴⁵ Nènku mònaayi mpindyewu ne, Yèyè wàkenza muntu, kàdi muntu kudishindayè. Ke kutùùluka Yè ne kupikula muntu, bwalu Nzambi ùtu munangè kukuukudiibwa. Mwàkù mwinè *nzambi* ùdi ùmvwija “cintu cyà dikuukwila.”

Nènku eci cidi cilwa munkaci mwètù, bu Dikunji dyà Kapyà, bu cintu kampànda cidi cishintululà myoyi yètù, awu n’Nzambi umweumwe wàkamba ne: “Bukènkè bwikalèku,” ne bukènkè bwàkiikalakù. Yèyè ùdi umweumwe awu makèèlèlè, leelù, too ne kashidi.

⁴⁶ Mpindyewu, ku cibangidilu Nzambi wàkasòmba nkààyendè, ne byambiibwà Byèndè, ànu mùmvwà mwàmbè mù dindà emu amu. Ke meeji Èndè ngòwò awu. Kakùvwa cintu nànsha cimwè to, ànu Nzambi nkààyendè, kàdi Yèyè ùvwa ne meeji.

Bidi ànu mùdi lwàpàngà nzùbu munène mwà kusòmba panshi, mu meeji èndè, kàdi e kuzòla patòòke cidieyè wèla meeji ne ke cyôci aci, ciikalàye ne—ne cyà kwibaka aci. Kufùka, mpindyewu, yèyè kèna mwà kufùka to. Yèyè ùdi mwà kwangata cintu kampànda cidi cifùkiibwe ne kucivwija mu mmwènekèlu mushiilàngàne; bwalu Nzambi ke njila umwèpelè. . . Umwèpelè udi mwà kufùka. Kàdi ùdi ùpeta mu meeji èndè ciikalàye ne cyà kwenza, nènku ke meeji èndè ngòwò awu, ke majinga èndè ngòwò awu. Mpindyewu meeji kampànda, ne pashiishe ùdi ùcyàmba, nènku díbà adi cidi n’díyi.

⁴⁷ Ne dí—díyi mmeeji, pàdidi dyambiibwe patòòke, didi ndíyi. Meeji mapàtula patòòke àdi díyi, kàdi bikèngela dyàmbedi ciikalè meeji. Pa nànkù, mbyambiibwà byà Nzambi; díbà adi bidi bìlwa meeji kampànda, pashiishe díyi kampànda.

⁴⁸ Mònaayi. Aba bàdi, dilòòlò edi, ne Mwoyi wà Cyendèlèlèlè abu, bàvwa Nendè ne munda Mwèndè, mu meeji Èndè, kumpàlà mene kwà kwikalakù Mwanjèlò kampànda, mùtootò, Mukèlùbà, anyi ní ncinyi cikwàbò. Aci’s ncyà Cyendèlèlèlè. Nènku wèwè ne Mwoyi wà Cyendèlèlèlè, wèwè uvwa misangu yònsò ànukù. Kí nkampànda webè udi kaaba aka to, kàdi mbungakeenu ne mmwènekèlu uvwa Nzambi wa kàyì mikàlù awu. . .

⁴⁹ Ne Yèyè kàyì wa kàyì ne mikàlù awu to, Yèyè kèna Nzambi to. Bikèngela Nzambi ikalè kàyì ne mikàlù. Twètù tudi ne mikàlù; Yèyè kèna ne mikàlù to. Ne Yèyè ùvwa myaba yònsò, mumanyè byònsò, ne wa ngulu yònsò. Yèyè kàyì nànkù to, díbà adi Yèyè kèna mwà kwikala Nzambi to. Mmumanyè bintu byònsò, myaba yònsò, bwalu Yèyè ùdi myaba yònsò. Bu mudìYe Mumanyè byònsò ke cìdi cìMwenza mwikàle myaba yònsò. Yèyè ùdi Kampànda; Kèna bu lupeepèlè to. Yèyè ùdi Kampànda; Ùtu ùsòmbela mu nzùbu kampànda. Kàdi bu mùdìYe mumanyè byònsò, mumanyè maalu ònsò, cìdi cìMuvwija mu myaba yònsò, bwalu Yèyè mmumanyè byònsò bìdì munkacì mwà kwenzeka.

Kakwèna mwà kwikala nkùpà ùpòdya udiYè kàyì mumanyè nànsha. Ne Yèyè wàkacìmanya kumpàlà kwà kwikalakù dyulu ne buloba, mmisangu bùngì kaayi yìvwàye mufwànyine kupòdya, ne bùngì bwinè bwà màfutà bùvwàye naabù munda amu, kumpàlà mene kwà kwikalakù dyulu ne buloba. Aci's ki kwikala kàyì mikàlù. Katwèna mwà kucyùmva mu meeji ètù to, kàdi n'Nzambi. Nzambi, kàyì mikàlù!

⁵⁰ Nènku vùlukàayi ne, wèwè, mèsù èbè, cipidi cyèbè, cyònsò cyùvwa aci, uvwa mu meeji Èndè ku cibangidilu. Nènku cintu cìmwèpelè cyùdi wèwè ngakwilù, dìyì. Paanyimà pàa Yèyè mumane kucyèlele meeji, Yèyè wàkacyàmba, kàdi's ki bwalu mbwòbù ebu. Kabìyì nànkù to, bu ne kùvwa mu meeji Èndè to, kakwèna mùshindù nànsha mukèsè wà wèwè kwikalakù to, bwalu Yèyè ke Udi ufila Mwoyi wà Cyendèlèlè.

⁵¹ Nudi bavùlùke mutwàbadì Mifùndu anyi? “Kí ng'ewu udi muswè, anyi ewu udi unyeema to, kàdi Nzambi!” Ne bwà didyanjila-kulongolola Dyèndè kushàaladi dilelèlè, Yèyè ùvwa mwà kusungula, kumpàla kwà díbà kanà dyònsò. Udi . . . Nzambi mmudishikàmine mu disungula Dyèndè. Nuvwaku bamanyè nànkù anyi? Nzambi mmudishikàmine.

Nganyi uvwa kuntu kwàka bwà kuMwambila mùshindù mutàmbe bwimpè bwà kufùka buloba? Nganyi udi mwà kudidìnga kwamba ne Yèyè mmwenze mudimu Wèndè bibì?

Nànsha Dìyì diinè—diinè, Dyòdi diinè, ndidishikàmine ànu byà menemene ebi. Nànsha dibuulula diinè ndidishikàmine. “Yèyè ùdi ùbuulwila ewu udiYè muswè kubuulwila.” Dibuulula diinè, dyòdi diinè, ndidishikàmine mu Nzambi. Mùshindù awu ngùdi bantu bàtuuta bintu kampànda, ne bàtùpikila pa bintu kampànda, ne bàlenga bintu kampànda, kabàyi bamanyè cìdìbo bènza to. Nzambi mmudishikàmine mu byenzi Byèndè.

⁵² Mpindyewu tudi tuMusangana ku cibangidilu, byambìibwà Byèndè. Nènku, mpindyewu, nuvwa Nèndè pa díbà adi. Pa díbà adi ke pàdi Mukànda wà mwoyi ùmwènekela patòòke.

Mpindyewu, tudi tubala mu Bwàkabuulwibwà emu nshapità wa 13, mvensà wa 8, ne: “Nyama udi ulwa pa buloba,” mu matùkù à ndekeelu aa, “neàseeswishe bantu bònsò bàdi pa

buloba abu beena mènà àvwà kaayi mafùnda mu Mukàndà wà Mwoyi wà Mwànà wa mùkòòkò kumpàla kwà difùka dyà dyulu ne buloba.”

⁵³ Anji elàayibi meeji ku bwalu abu! Kumpàlà mene kwà Yesù kulediibwayè, bidimu binunu binaayi kumpàlà kwà kulwaYè pa buloba, ne bidimu binunu byàbùngì kumpàla kwà wèwè kulwa pa buloba, Yesù, mu meeji à Nzambi, wàkafwà bwà mpèkaatù yà bàà pa buloba, ne Mukàndà wà Mwoyi wàkafùndiibwa, ne dìnà dyèbè dyàkafùndiibwa mu Mukàndà wà Mwoyi awu, kumpàlà kwà difùka dyà dyulu ne buloba. Aci's m'Bulelèlè bwà mu Bible. Nwamònu's, dìnà dyèbè dyàkalongolodiibwa kùdi Nzambi ne dyàkatèekiibwa mu Mukàndà wà Mwoyi kumpàlà kwà difùka dyà dyulu ne buloba.

⁵⁴ Wèwè uvwakù mu byambiibwà Byèndè. Kwèna ucivùluka to, to, bwalu udi ànu citùpà cyà Mwoyi Wèndè. Wèwè udi citùpà cyà Nzambi paùdi ulwa mwànà wa balùme anyi mwànà wa bakàji wa Nzambi.

Ànu bu múdi citùpà cyà tatwèbè wa pa buloba amu! Ncyà bushùwà. Ke cyùdi. . . Mulùme mmwambùle kabùlù kàà mashi, mashi awu. Ne piikalà aku kayè mu—mu diyì, dībà adi udi ulwa citùpà cyà tatwèbè; ne mamwèbè udi citùpà cyà tatwèbè, yèyè pèndè; pa nàнку wèwè yònsò udi citùpà cyà tatwèbè.

Butùmbi's wè! Aci's cidi cishiya dìngumba ku luseka, mu kaabujimà. Uh-huh. S'ncyà bushùwà nàнку! Nzambi, mu byònsò, mwaba ùmwèpelè awu's!

⁵⁵ Mònaayi mpindyewu cyambiibwà Cyèndè. Dībà adi cyambiibwà cìvwakù, dyàmbedi, Nzambi; meeji awu, cyambiibwà cyòci ciinè, byònsò mu Umwe, kaciyi cyakùdiibwe patòòke to. Pashiishe pàakaakulàYe patòòke, ciibìdi, Yèyè wàkalwa Dìyi dībà adi. “Ne pashiishe Dìyi dyàkandamuka mubidi ne dyàkasòmbela munkaci mwètù.”

⁵⁶ Yone Munsantu nshapità 1 ku mvensà 1, mònaayi ne, eci cidi ne: “Ku cibangidilu.” Kàdi, kumpàla, wà Cyendèlèlè! Mònaayi ne: “Ku cibangidilu kwàkadi Dìyi.” Pààkabangà cikondo, cìvwa n'Dìyi. Kàdi kumpàlà kwà kwikalaci Dìyi, cìvwa cyambiibwà, meeji kampànda. Pashiishe dyàkaleejiibwa patòòke ne: “Ku cibangidilu kwàkadi,” ngakwìlù wa patòòke, “Dìyi adi.”

Mpindyewu tudi tufika kùdi Melekisedekè ùsanganyiibwa. Ki Muntu udi kàyì ùmvwika ewu. “Ku cibangidilu kwàkadi Dìyi, ne Dìyi dyàkadi ne Nzambi, ne Dìyi dyàkadi Nzambi.” “Ne pashiishe Dìyi dyàkalwa mubidi ne dyàkasòmbela munkaci mwètù.” Kwàtaayi aci mwaba awu mpindyewu, mònaayi.

⁵⁷ Buumùntù Bwèndè—Bwèndè bwà kumpàla bùvwa Nyumà, Nzambi, mutàmbe-mfùkilu, èyo, Wa Cyendèlèlè munène awu. Ciibìdi, Yèyè kubanga kuDìvùnga mu mubidi, mu *tèòfàni* ùdi ùbìikidiibwa ne, “Dìyi, mubidi.” Eci dībà adi ki ngiikadilù uvwaYè ùsanganyiibwa pàvwàYe mutwilàngàne ne Abraham,

wàkabùikidiibwa ne m'Melekisedekè. Ùvwa mu mmwènekeli wa tèòfàní. Mpindyewu, netùkafikè ku cyòci aci bwà kuciijaadika mu tusunsa tukesè emu, bu Mukalenge mwà kwanyisha. Yèye ùvwa Dîyi.

⁵⁸ Tèòfàní ncintu kampànda cyùdi kùyikù mufwànyine kumòna to. Ncifwànyine kwikala apa mene mpindyewu, kàdi kùyi mwà kucimòna to.

Mbyenze ànu bu ne, èè, bu mùdi ntèlèviziyò. Aci's mmu cipaapu cikwàbò. Ntèlèviziyò; bantu bàdi munkaci mwà kupicila mu cibambalu emu patùdi twakulangana apa, munkaci mwà kwimba; kùdi meekala, kàbìdi. Kàdi dísù didi ànu dikòòkela byumvwilu bitaanù. . . Buumùntù bwèbè bujimà bùdi bùkòòkela ànu byumvwilu bitaanù, èyowà's. Ne wèwè udi ànu mu dikòòkela dyà cidi lumònò lukòsela bwà kumòna. Kàdi kùdi cipaapu cikwàbò cidi mwà kumwènekela ku dishintulula, ku ntèlèviziyò.

⁵⁹ Mpindyewu, ntèlèviziyò kàtu ùkwàtakaja cimfwànyì to. Ntèlèviziyò ùdi yèyè ùlombola ànu bimfwànyì mu kajila kampànda, ne pashiishe cimwènyì cyà ntèlèviziyò cidi cìcibàkula. Kàdi fòtò awu ùdipù, ànu kwìnè kwònsò aku. Ntèlèviziyò ùvwa kaaba aka pàvwà Adàmà kaaba aka. Ntèlèviziyò ùvwa kaaba aka pàvwà Eliyà musòmbe pa Mukùnà wà Kaamèlè apu. Ntèlèviziyò ùvwa kaaba aka pàvwà Yesù wa mu Nazàlèeta wènda wèndakana ku myelelu yà Ngaalèlà. Kàdi mpindyewu ewu ki unùdi ànu numujandula. Kabàvwa mwà kumwitabuujà kale wàwa nànsha. Nùnkù's uvwa kwikala mupàle bwà kwikala mwàmbè cintu kampànda bu cyòci aci. Kàdi mpindyewu's cikaadi cilwè cintu cyà bushùwà.

Nènkù ki mùdibi kàbìdi ne, Kilistò ùdi kaaba aka, Banjèlò bàà Nzambi bàdi kaaba aka. Ne dīngà ditùkù, mu Bukalenge bunène bwà bidimu cinunu bùcìlwalwà abu, nebùkale bilelèlà menemene ànu mùdi ntèlèviziyò emu anyì cintu kanà cyònsò eci amu, bwalu bidi mwab'ewu.

⁶⁰ Ùdi ùDìbuulula mu mmwènekeli Wendè munène wa cidiYe mwambè, pàdiYe *ùDyàlula* Yèyè mwinè mu basadidi Bèndè ne ùDijaadika.

⁶¹ Mpindyewu, s'ki Yèyè ewu mu mmwènekeli wa Nyumà. Ne pashiishe Ùdi ùlwa mu mmwènekeli wa . . . wa *didyàlula*. Mpindyewu, Yèyè wàkamwènekela Abraham, mu *didyàlula*. Pàvwà Abraham munkaci mwà kupingana ku dishebeya dyà bamfùmù, ke Melekisedekè ulwàlwa ewu, kwakulaYè nendè.

⁶² Ditùkù adi mu cibejibeji cyà ku Tucson, mvwa mbala kaabwalu kampànda kàà ne kùvwa mu—muntu mukàji kampànda mwikale wèndesha kàshinyì ùpweka ne njila, ngèèla meeji mu lubilu lwà kilòmèetà makumi àsambòmbò ne yìnaayi, anyì makumi mwandamukùlù ku dībà dīmwe, e kutuutayè muntu mukùlakàje muvwàle cinkooci. E kwelayè

lubilà lukolè kwimanyika kàshinyi kèndè. Kàvwa kamukùpe muulu. Munkaci menemene mwà cipèèlà mwàmwa's! Ki yèyè kupingana cyànyimà bwà kumusangana, kàdi kàvwapù to. Pa nàнку wàkenza cinyi? Bàngà bantu paanyimà pèndè apu bàvwa bamòne civwà cyenzèke aci, bàvwa bamòne muntu mukùlàkàje awu ùbùùka muulu, ne cinkooci cyèndè cinyùnguluka. Ki kwalukilabò lubilu bwà kujandula. Kabàvwa mwà kupeta muntu awu mwaba nànsha wùmwe to. Bàakabiikila bampùlushi. Mpulushi kupàtuka bwà kukenketa mwaba awu; kakuvwa muntu nànsha umwe mwaba awu to.

⁶³ Èè, yònsò wa kùdìbo wàkafila bujaadiki ne: “Kàshinyi kudila, kutuutakù muntu awu. Yèyè kubànda muulu, ne bantu bònsò kucimònabò.” Baantèmù, ne bantu bàvwa bùlè tente mu tùshinyi tùbìdi anyi túsàtù, bàvwa bamòne pàvwàci cyenzèke. Kufikabò kudijandula ne, kùkaavwa bidimu bitaanu bipite, kùvwa muntu mukùlàkàje kampànda muvwàle cinkooci, wàkatuuciibwa ne kushipiibwa ànu mwaba wùmwe wùmwe awu.

Paùdi uumuka pànwapa, kwèna mufwè to. Bikèngela wàlukilè, nànsha wèwè mwikàle ngènzàmpèkààtù, ne ùlumblwishiiibwè bilondèshile byenzedi byùvwa mwenze mu mubidi. “Ntenta wa pa buloba ewu yèyè munyangùke, tudi ne mukwàbò mwindile.” *Kudyàlula*, ke mwàkù ngwòwò awu's.

⁶⁴ Mpindyewu, Nzambi, mu eci citùpà cyà...Ncitùpà cyà bufùki Bwèndè eci, pashiishe civwijiiibwe mubidi, Yesù. Kuumukila ku cinyi? Kuumukila ku cibangidilu cinène, Nyumà, pashiishe kupwekaYè bwà kwikala Dìyi, diikale diDìpàtula Dyòdi diinè patòòke. Dìyi kadyèna diDìvwiya Dyòdi diinè to, didi dyakula ànu cyanààna, *didyàlula*, pashiishe Yèyè ùdi ùlwa mubidi, Yesù, wa cifwàkà, bwà kulabula lufù bwà twètù bònsò bangènzàmpèkààtù.

⁶⁵ Pààkatwilanganà Nèndè Abraham, Yèyè ùvwa Melekisedekè. Ùdi ùvùngulula mwab'ewu ciikalà byambiibwà byònsò mwà kwenza ku ndekeelu, mwànà yònsò wa Abraham. Mwànà yònsò wa Diitabuujà kakùyì mpatà to neènzè cintu cimwècimwè aci. Kàdi ndi muswè kutàngila mudibi bikèngela bwà twètù kulwa.

⁶⁶ Kàbìdi, tudi tuMumòna mubuulùdiibwe mwab'ewu mu Luutà ne—ne Boàzà, bu Cilongo Cipikudi, mùshindù mwinè wàkakèngelàbi bwà kulwaYè bwà kwikala musunya.

⁶⁷ Mpindyewu tudi tumòna bânà bàà balùme byambiibwà byà Nyumà Wèndè, kabàyi bânji kubwela mu mubidi wa mmwènekèlu wa Dìyi to. . . kàdi. . . tèòfàni. *Ewu* mubidi wùdi ku bukòòkeshi bwà Dìyi ne cyeyà. . . mwindile cyeyà, dishintuluka dyà mubidi.

⁶⁸ Mpindyewu, dishiilangana pankaci Pèndè ne wèwè, bu mwànà wa balùme ndyà ne: Nwamònu's, Yèyè ùvwa, ku cibangidilu, Dìyi, mubidi wa *didyàlula* awu, Yèyè

wàkabwelamù ne wàkasòmbela mu wôwò awu, mu Mupèsonà wa Melekisedekè, pashiishe pàakapità matùkù katwàkumvwakù kàbìdì bàakula bwà Melekisedekè to, bwalu Yèyè wàkalwa Yesù Kilistò, Melekisedekè ùvwa Mwakwidi kàdì Wàkalwa Yesù Kilistò, mpindyewu, nwènù nudi bacingulùke aci. Bwalu mu mmwènekelu awu, Yèyè ùvwa mumanyè bintu byònsò, ne kacya kanùtuku bânji kufika ku dimanya aci to.

Wêwè udi ulwa bu Adàmà, bu mémè, udi mulwè kuumukila ku cyambiibwà too ne ku mubidi, bwà wêwè kuteeciibwa. Kàdì pààjìkà mwoyi ewu pànwapa: “Ntentà wa pa buloba ewu yèyè munyangùke, tukàadi ne mukwàbò mwindile.” Ki kutùyaayi nkwòkù aku; ki Dìyì ndyòdì adi. Dìbà adi tudì mwà kutàngila paanyimà ne kumòna citùdì twètù benzè. Mpindyewu katwèna tucyùmvwa to. Kacya katùtukù banji kulwa Dìyì to; tudì balwè ànu muntu-musunya, kí n’Dìyì to.

⁶⁹ Kàdì, nènku tàngilàayi, patòoke too mùdìci cìcìvwija citòoke, kwàdyàkulwa Dìyì pìikalàbi ne kùvwa meeji ku cibangidilu nànsha. Aci’s cìdì cijaadika didyànjila-kulongolola dyà Nzambì. Nwamònu anyì? Kwèna mwà kwikala Dìyì paùdì kùyì meeji to. Bìvwa bìkèngela wêwè kwikala mu meeji, dyàmbedi.

Kàdì, nudi numòna’s, bwà kutwàla diteeciibwa, bìvwa bìkèngela nùcingulukè tèòfàní awu. Byàkakèngela bwà nùlwe pa buloba apa mu mubidi, bwà kuteeciibwa kùdì mpèkaatù. Ne pashiishe, nwènù batwè makàsà panshi ne: “Yònsò udi Taatù muMpèèshe nealwe kùNdi, ne Mémè nèmmujuulè ku matùkù à ndekeelu.” Nwamònu’s, bìvwa bìkèngela wêwè kwikalakù dyàmbedi.

⁷⁰ Ne pashiishe, nudi numòna’s, Yèyè wàkatùuluka buludi, mu njila wa ciibidilu, kuumukila ku cyambiibwà too ne ku . . . Kumpàlà kwà difùka dyà dyulu ne buloba, dìnà Dyèndè ndifùnda mu Mukàndà wà Mwoyi wà Mwàna wa mùkòòkò. Pashiishe, kuumukila ku cyòci aci, Wàkashàala Dìyì, tèòfàní, uvwa mwà kumwènaka, kujìmina awu. Ne pashiishe Yèyè wàkalwa mubidi ne mwalùkile cyàkàbìdì, mubiishe mubidi wùmwèwùmwè awu ku lufù mu ngiikàdilu mutùmbìshìibwe.

Kàdì wêwè wàkacinguluka tèòfàní awu ne kulwa muntu wa musunya, bwà kuteeciibwa kùdì mpèkaatù. Ne pashiishe: “Ntentà wa pa buloba ewu yèyè munyangùke, tukàadi ne mukwàbò mwindile.” Katwèna bânji kwikala ne mibidi ayi to.

⁷¹ Kàdì, tàngilàayi’s! Pàdì mubidi ewu ùpeta Nyumà wa Nzambì, Mwoyi ùdì kawùyi ùfwa awu munda mwèbè amu, cìdì cikùpa mubidi ewu mu dikòokela Nzambì. Àlèluuyàh! “Ewu udi mulela kùdì Nzambì kèna wènza mpèkaatù to; kèna mwà kwenza mpèkaatù to.” Loomò 8.1: “Ki bwà cinyi kakwèna mpindyewu dipiila bwà aba bàdì mu Kilistò Yesù nànsha; bòbò kabèèna bènda bilondèshìle mubidi to, kàdì bilondèshìle Nyumà.” Ki

bwalu mbwôbù abu's. Nwamònu's, aci cidi cikùpa mubidi wèbè mu dikòòkela.

Kabyèna bìkèngela wêwè kwamba ne: “Kaa, ngíkalapù nànsha mwà kulekela kunwà maala's wè! Ngíkalapù nansà ànu mwà. . .” Bwelà wêwè ànu mu Kilstò, ne byònsò mbiyè, nwamònu's, nwamònu's, bwalu mubidi wèbè mmukòòkèla Nyumà. Kawùcyenà kàbìdì ùkòòkela maalu à pa buloba nànsha; àkaadi mafwè. Àkaadi mafwè; mpèkaatù yèbè mmijiikìlbwe mu dibàtiiza, ne wêwè udi bufùki bupyabùpyà mu Kilstò. Ne mubidi wèbè, wenda ushààla mu dikòòkela kùdì Nyumà, uteeta kwikala ne nsòmbelu wa mùshindù mujaalàme.

⁷² Bu nwènu bakàjì bàdì bàmba munùdì ne Nyumà Mwìmpè, kàdì nupàtuka apa bavwàle tùpùtulù ne bikwàbò, mmunyi munùdì bafwànyine kucyènzà's? Mmunyi mùdì Nyumà wa Nzambì munda mwèbè mufwànyine kukulekela wenza cintu bu nànkù awu? Kabyèna ànu mwà kwikala nànkù to. Cyà bushùwà, kacyèna mwà kwikala nànkù to. Yèyè kí nnyumà wa bukooyà to; Yèyè n'Nyumà wa cijila.

⁷³ Ne pashìishe paùdì ulwa mukòòkèla Nyumà awu, cidi cifila buumùntù bwèbè bujimà ku dikòòkela Nyumà awu. Ne Nyumà awu kèna cintu cikwàbò to nànsha kakesè ànu Dimiinù Diyì edi dimwèneshiibwe, anyì difuùlùlùdiibwe, àlèluuyàh, divwijìlbwe ne mwoyi. Ne pàdì Bible mwambè ne: “Kwènji *cikampànda* to,” mubidi awu ne lùkàsà lwònsò ùdì ùtàngila kùdìYe. Kakwèna mpatà to.

Nènku ncinyì aci? Ncyeyà cyà dibìikà dyà ku lufù. Mubidi ewu newùjuudiibwè cyàkàbìdì, bwalu wùkaadi mumane kubanga. Kale wàwa ùwva ùkòòkela mpèkaatù, ne bitoci ne cinyangu, kàdì mpindyewu ùdì ne cyeyà; mmukùdimùke mulwè wà mu Dyulu. Mpindyewu, ke cyeyà ncyòci aci cyà ne udi uya mu Dyambwibwa. Ke cyeyà ncyòci aci.

⁷⁴ Mubèèdì mulàadika, ùpunga ne lufù, kakùciyi cidi cishààle to ànu lufù; ke cyònsò cidi mwà kwenzeka. Nkààdikù mumòne mindidimbì yà bantu, bamana kudyà kùdì kànsèrè ne disaamà dyà cyàdì; ne mmòna bantu abu, katancì kakesè paanyimà pàà cyòci aci, bapwàngàne mwàbò ne kale menemene ne makàndà. Kwòkò kakùyì dyondopa dyà kùdì Nzambì to, dìbà adi kakwèna dibìikà dyà ku lufù to, bwalu dyondopa dyà kùdì Nzambì ncyeyà cyà dibìikà dyà ku lufù. Amen!

⁷⁵ Nudi bamanyè cidi mfrangà yà cyeyà ayi, kí mmwòmò anyì? Ncitùpa cyà kumpàla cyà musinga. “Wàkatàpiibwa mpùtà bwà kushipa kwètù kwà mikenji; ku mibùndàbùndà Yèndè twàkondopiibwa.” Mònaayi mùdì bwalu bulenga's wè! Tudi baMunangè.

⁷⁶ Mpindyewu, mubidi ewu wùdì ku bukòòkeshi bwà Nyumà. Kacya katùtu bânjì kubwela mu mmwènekèlu wa Diyì to, kàdì

tucidi ànu mu mmwènekelu wa mubidi, kàdi biikàle tukòòkela ku Dìyi. Lufù mu mubidi nelùtùfikíshe kuntwaku.

⁷⁷ Ànu cintu cìmwècìmwè aci, elàngànà meeji bwà mwànà mukesè wa mu dibòko. Udi mwà kwangata mukàji, nànsha bàmba ne mmubi wa bìshi, díbà didiye ne difù wàmba kulela. Tàngilàayi, kumpàlà kwà mwànà awu kulediibwayè, maamù awu nànsha bàmwamba ne ngwà lwonji lwà bìshi, ùdi ùlwà ne kalolo kàà menemene. Kùdi cintu kampànda ku dyakula dyèndè. . . cìdi cìmwèka cyà difwànà dyà Nzambì, bwà kumòna maamù matekète pabwipi ne kulela, mwànà awu. Bwà cinyi bìdi nànkù? Kaamubidi kakesè aku, mpindyewu, kí nkànji kwikala ne mwoyi to, nwamònu's, cintu cìmwèpelè cidiku cidi ànu musunya ne mapùndà cyanàànà. Ditùpika dikesè adi, cidi ànu mapùndà cyanàànà munkaci mwà kujeekekana. Kàdi pàdiwu ànu ùpàtuka mu difù, Nzambì ùdi ùpùdila mupùyyà wà mwoyi munda mwàwù, díbà adi ùdi wèla lubila lukolè. Nwamònu's, ànu mùdìbi—ànu mùdìbi bushùwà ne mubidi wà mu bufùki ùdi munkaci mwà kufwìmbiibwawù amu, kùdi mubidi wà nyumà bwà kuwàkidila pàdiwu ànu ne wàfiki kaaba aka.

⁷⁸ Díbà adi, pàdi muntu ùlediibwa cyàkàbìdi, ùfùmina mu Dyulu, ùdi ùlwa mwànà wa mu nyumà wa mu Kilistò.

Nènku, díbà adi, pàdi mùzàbì wa mubidi ewu ùmata, kùdi mubidi wà cifùkidi, tèòfàní, mubidi kawùyi mwenza ne byanza, anyi mulela kùdi mukàji to, utùdi tuyakù.

Pashìshe mubidi awu wùdi wàlukila wùbàkula mubidi mutùmbìshìbwe.

Ki bwà cinyi Yesù wàkaya mu ifernò pàakafwàYe, ne wàkayìsha misùukà yìvwà mu bùlokò ayi; kwalukila e kubwela mu tèòfàní awu. Kaa, bilenga be! Twasàkidila Nzambì!

⁷⁹ Kolintò Mwibìdi 5.1: “Mubidi wà pa buloba ewu wówò munyangùke, ntentà wa pa buloba ewu, tudi ne mukwàbò.” Nwamònu's, tudi bacìngùlùke wówò awu, bwà kuumukila buludi kùdi Nzambì, cyambiibwà aci; bwà kwikala mubidi, bwà kuteeciibwa ne kwediibwa ku diteeta dyà mpèkaatù, mwàkenzà Adàmà amu. Kàdi pàdi dyediibwa dyà ku diteeta dyà Dìyi Dyèndè dimanè kujika, díbà adi tudi bangàciibwe ku mubidi ewu wùvwà mutùlongolwela kumpàlà kwà difùkà dyà dyulu ne buloba. Dìyi adi nditùdi batùpìke, bwà kunyunguluka kulwa emu, panshi apa bwà kuteeciibwa ne kwediibwa diteeta. Bu ne tuvwa bapicile mu cyòci aci, nùnkù's kakùvwakù kufwànyine kwikala diteeciibwa to; nùnkù's tudi bamanyè bintu byònsò. Ki bwà cinyi Yesù ùvwà mumanyè bintu byònsò, bwalu Yèyè ùvwà Dìyi kumpàlà kwà kwikalaYè mubidi. Pashìshe tudi tulwa Dìyi.

⁸⁰ S'ki twètù aba benza ku cimfwànyì cyà Dìyi, bwà kwikala mwabanyanganyi wa Dìyi, tudiishiibwa ne Dìyi, ku diikala badyànjlila-kulongolola ànu ku cibangidilu. Nudi numòna katoba kakesè kàà Mwoyi aku kanùvwà naaku munda mwènù

kacya ànu ku cibangidilu aku, panwàkabanga lwendu lwèndù apu anyi? Bààbùngì bàà kunùdì bàdì mwà kucivùluka. Udi mukashààla wa mu èkèleeziyà *kampànda* ne mukashààla wa mu èkèleeziyà *kansanga*, uvwa mwà kuteeta *cikampànda* ne *cikansanga*; cintu nànsha cimwè kí ncisànkishe to. Ncyà bushùwà. Kàdì dîngà ditùkù wèwè kuCjingulula ànu cyanààna. Cyà bushùwà.

⁸¹ Dilòlò adi mwà ndongesha mwaba kampànda, ngèèla meeji ne mùvwa mmu Californie anyi mu Arizona mwàmwa, pa bìdì bitàngilà. . . Ngèèla meeji ne mwà mulonde kabwalu kakesè aku mwab'ewu, bwà muntu kampànda ùvwa ne cikuka cyà nzòòlo cilaàdile kàdì kucitèekelayè diyì dyà mukankù. Nènkù pàakatooyikà mukankù awu, wùvwa nnyuunyi wa mmwènekèlu wa pabwèndè uvwa tuzòòlo atu katùyikù kacya twànji kumòna to. Kàdì, kunyùngulukawù. Wówò ùvwa—wówò ùvwa mubi wa nkòtòòtò munkaci mwàtù, bwalu kawùvwa ànu mwà kuumvwa mùvwa cikuka aci mwà kwenza cyokò-cyokò ne kukala pa mushikì wà tùmvi twà nyama awu ne kudyà to. Kàvwaka mwà kupeta cingènyingenyi aci to. Ùvwa mwà kwamba ne: “Lwàkù kunweku twenze difestò, munanga wanyì!” Kàdì yèyè—yèyè ùvwa mukankù; kàakadya ànu mùshindù awu to. Kacivwa cyàkudyà cyèndè to.

⁸² Pa nànkù ùvwa mwà kukwàta tupasu ne bikwàbò, nudi bamanyè's, ne kubiikila tuzòòlo kukesè atu. Nènkù tuzòòlo twònsò atu tùvwa mwà kutùngunuka, twènda tùtuuta cyokò, twènda tùdya. Kàdì kaamukankù kakesè aku kakàvwakù mwà kucyènza to. Kabivwa—kabivwa bimwèke bimpè kùdiku to.

Ke dîngà ditùkù mamwàkù kulwayè wènda ùkèbangana naakù.

⁸³ Nènkù ùvwa mwà kumvwa cikuka cyà nzòòlo aci cìtuuta cyokò-cyokò. Ùvwa mwà kuteeta ne mwèndè mwònsò bwà kutuuta cyokò-cyokò, kàdì kàyì mwà kucyènza to. Wàkateeta bwà kudila bu kànà kàà nzòòlo, kàdì kàvwa mwà kucyènza to. Nwamònu's, yèyè ùvwa mukankù. Yèyè, ànu kwìnè kwònsò aku, yèyè ùvwa mukankù. Ùvwa ànu mutooyike cyanààna mwinshì mwà nzòòlo wa cikuka.

Aci's ncyènza ànu bu bimwè bidimba byà èkèleeziyà. Yònsò. . . Aci's cìdì ànu bu mùshindù ùdibi; ànu bu umwe pa diswa, ki udi mwìmpè.

⁸⁴ Kàdì dîngà ditùkù mamwàkù kubùukayè, ki kwelayè lubilà lukolè. Yèyè wàkalùjingulula. Aci's civwa cyumvwika ànu cijaalàme. Bwà cinyi? Yèyè ùvwa mukankù, ànu kwìnè kwònsò aku.

Ke mùshindù wùdibi ne Èvànjeeliyò, anyi Dìyì, anyi Bukolè bwà Yesù Kilistò. Pàdì muntu mudyànjiila kulongolwela Mwoyi wà Cyèndèlèlèlè, ùdì ùmvwa ngonga mulelèlè awu, lubilà

lukolè lwà Nzambì alu, cintu nànsha cimwè kacyèna mwà kumupangishaKù to.

Èkèleeziyà mmufwànyine kwamba ne: “Matùkù à bishimà àkaadi mamanè kupita,” cyokò, cyokò, cyokò. “Kwimana apa ne kudyà *cikampànda*, ne kwimana apa ne kudyà *cikansanga*.”

⁸⁵ Cintàkanyì cyà mu lupangu lwà nzòlo aci kacyàkumukumbana kàbidì to, nànsha kakesè. Mmumanè kuya! “Bintu byònsò bìdi mwà kwenzeka!” Ùdi ùmuka pa buloba.

Ki bwà cinyì, bwalu bùdi naabù beena Kilistò bààbùngì leelù ewu, kabèena mwà kujuula makàsà àbò panshì to.

Maamù mukùlākàjì awu kwambayè ne: “Mwanàànyì, tùpikà! Wèwè’s udi mukankù. Bànda kùneeku kùndì eku.”

Yèyè ne: “Maman, neitukù mwanji kutùpikakù to, kacya bàndela.”

⁸⁶ Yèyè ne: “Èè, wèwè tùpika! Wèwè’s udi mukankù, ànu kwìnè kwònsò aku. Kwèna nzòlo to.” Pa nànkù ki kutùpikayè bwà musangu wèndè wàkumpàla e kupaapalayè; kàvwa ànu mutàmbe kuya muulu mulè to, kàdi wàkuumusha makàsà pa buloba.

Mùshindù awu ke utùdì twenza. Tudi twitaba Nzambì ku diitabuuja, ku Dìyì difùnda. Kùdi cintu kampànda munda amu; m’Mwoyi wà Cyendèlèlè awu. Wèwè uvwa mudyanjila kulongolwela cyòci aci.

⁸⁷ Kakwèndè mulùme ne kakwèndè mukàjì bàvwa mikankù. Yèyè ùvwa mukankù, ànu ku kale kwònsò aku. Mukankù kawèna wùdisopakaja ne bikwàbò bintu to. Yèyè kì mmusopakaja to nànsha kakesè, yèyè mmukankù.

⁸⁸ Pashìishe, paanyimà pàà wèwè mumanè kujingulula ne Dìyì mene dyà Nzambì dìvwa Cyàkudyà cyà Mukankù, dìbà adi udi ushiya cikwàbò cintu. Dìbà adi ukàadi mwenjìibwe mu cimfwànyì cidi ne mwoyi cyà Nzambì udi ne mwoyi. Ukàadi mumvwè tèòfànì webè awu. “Mubidi wà pa buloba ewu wòwò munyangùke, tudi ne mukwàbò mwindile.”

Wèwè udi wamba ne: “Ncyà bushùwà anyì, Mwanèètù Branham?”

Èyo, twàngatàayi ndambù wa mikankù bwà kuyitàngila bwà katanci kakesè. Kùvwa dìnà kampànda, muntu dyèndè nnè Mòsà. Muntu yònsò mmumanyè ne mupròfetà ùtu ùbìikidiibwa ne mmukankù, mu Bible.

⁸⁹ Kùvwa mupròfetà dyèndè Mòsà. Nènku dīngà ditùkù Nzambì wàkamubiikila, ne kàvwakù muswè kumulekela ùya mu buloba abu to, ki yèyè—yèyè kufwila pa Lubwebwe. Banjèlò kumwangatabò kuya kamujiika.

Kùvwa muntu mukwàbò, mukankù, kabìvwa bikèngela nànsha bwà kufwàye to. Wàkasabuka ànu Yadènà, ke Nzambi kupwekesha Yè dikàlu panshì; ne mùzàbì wa mubidi ewu wàkawùpwekesha, ne kujuukayè ne kupeta difutu dyà kashidi.

Bidimu nkàmà mwandamukùlù bimanè kupita, bidimu nkàmà mwandamukùlù bimanè kupita, pa Mukùnà wà Dikùdimuka dyà mpàla, ki bantu bàbìdì abu mbwòbò aba biimàne apa. Mubidi wa Mòsà ukaavwa mubolè kùkaavwa bidimu nkàmà, kàdì's ki yèyè ewu mu mmwènekelu wa dikèma mu mùshindù wà ne nànsha Peetèlò, Yakòbò, ne Yone bàkamujingulula. Amen! "Ntentà wa pa buloba ewu yèyè munyangùke," pawikalà cyambiibwà cyà Nzambi cimwènèshùbwe patòòke pa buloba apa, "wèwè udi ne mubidi mwindile paanyimà pàà wèwè mumanè kuumuka pa buloba ebu." Ki bwòbò abu's, biimàne pa Mukùnà wà Dikùdimuka dyà mpàla, mu tèòfàní wabò. Bwalu, bàvwa bapròfetà bàvwà Dìyì dilwila kùdìbo.

⁹⁰ Kàbìdì tùmònàayi mupròfetà mukwàbò, musangu kampànda, dìnà dyèndè Samwèlè. Ùvwa muntu munène. Ùvwa mulongeshe Izàlèlèlà; mubàmbile ne kabàvwa ne cyà kwikala ne mfumù kampànda to. Yèyè ne: "Kacya nkàadiku munwàmbile bwalu bùmwe mu Dìnà dyà Mukalenge kabùyi bwenzèke anyi?"

Kwambabò ne: "To. Cintu cyònsò cyùtù mwambàmbe mu Dìnà dyà Mukalenge citu cyenzèke."

Yèyè ùvwa mupròfetà, ne wàkafwà.

⁹¹ Paanyimà pàà bidimu bu bisàtù anyi binaayi nànkù, mfumù awu wàkabwela mu lutàtù; aci's cìvwa nkumpàlà kwà Mashì à Yesù Kìlistò kwediibwawù panshì. Ùvwa mu mpàladiizò. Ne mwàmùlopò wa mu Endor wàkabiikila muntu kampànda bwà kulwayè, ne kusàmba Shawùlà. Nènku mwàmùlopò awu pàakamumònàye mwimàne kuulu, kwambayè ne: "Ndi mmòna nzambi ùjuuka mu buloba."

⁹² Nènku paanyimà pàà muntu awu mumanè kufwà, mujiikiibwe, ne mubolè mu lukità, ki yèyè ewu mwimàne mwaba awu mu nyòngòlò awu, muvwàle mizàbì yèndè yà mupròfetà ayi, ne ùcìvwa ànu mupròfetà. Amen. Bwalu yèyè wàkamba ne: "Udi mumbiikile bwà kumpàtula mu diikisha dyànyì bwà cinyì, pèèbè mumanè kushààlà mwena lukunà wa Nzambi?" Mutàngìlaayi mùdiye wàmba cipròfetà. "Mààlabà dilòòlò, pa dìbà edì, newikalè naanyì." Yèyè ùcìvwa ànu mupròfetà, nànsha mùkaavwàye muumùke mu mubidi ewu amu.

Nwamònu's, yèyè ùkaavwa mulwè pànwapa ne mwikàle citùpà cyà Dìyì adi, ne yèyè wàkabwela mu mubidi wà musunya awu mwalùkile mu mubidi wùvwà mumulongolwela kumpàlà kwà difukà dyà dyulu ne buloba awu. Wàkabwela mu tèòfàní,

uvwa Dìyì awu. Nwacyǔmvù anyì? Ke mwaba wùdì beena kwitabuuja bõnsò bàbwela patùdì tuumuka kaaba aka apa.

⁹³ Dìbà adi, mu mmwènekulu awu, cibwikilu dìbà adi nciuntùmùnyìibwe. Nudi numòna's, wèwè udi Dìyì, wèwè pèèbè, paùdì ubwelamù. Bu mwànà mukesè wa mu dibòko; bu mûngãmbì katancì aka . . .

⁹⁴ Mpindyewu mònaayi. Nzambi àtumbè bwà Bitampì bìdì bikàngula ebi, ndisambila dyànyì, bwà kumanya maalu aa!

⁹⁵ Mpindyewu dibuulula dilelèlè dyà Melekisedekè dìdì òmwèka patòoke. Cinyi? Yèyè ùvwa Nzambi, Dìyì adi, kumpàla kwà kulwaYè mubidi; Nzambi, Dìyì adi's. Bwalu, bìvwa bikèngela kwikalaYè nànkù; muntu mukwàbò nànsha umwe kàvwakù mwà kushààla kàyì ùfwa bu Yèyè to. Nwamònu's, mèmè mvwa ne taatù ne maamù; wèwè uvwa naabò, pèèbè. Yesù ùvwa ne taatù ne maamù. "Kàdì ewu Muntu Yèyè kàvwa ne taatù to, anyì kàvwa ne maamù to." Yesù ùvwa ne cikondo cyàkabangàYè; Muntu ewu kàvwa naaci to. Yesù wàkafila mwoyi Wèndè; Muntu ewu kàvwa mwà kucyènza to, bwalu Yèyè ùvwa Mwoyi. Ne m'Muntu umweumwe awu dìbà dyònsò. Ndi ntèkemena ne Nzambi ùdì ùnùbuulwilaci. Muntu umweumwe awu, dìbà dyònsò.

⁹⁶ Mònaayi mwànzù Wèndè: "Mfùmù wa bwakànè." Mpindyewu, Ebèlù 7.2: "Mfùmù wa bwakàne, ne Mfùmù wa ditalala." Yèyè ùdì bamfùmù bàbìdì. Mpindyewu tàngilààyi, Ebèlù 7.2: "Mfùmù wa bwakàne, kàbìdì Mfùmù wa ditalala." Yèyè ùdì bamfùmù bàbìdì muntwamu. Mpindyewu kacya ànu Yèyè wàbwela mu mubidi ne wàngatà mubidi Wèndè muulu, mu Bwàkabuulwibwà 21.16, Ùdì ùbìikidiibwa ne: "Mfùmù wa bamfùmù." Yèyè ùdì bàsàtù bõnsò abu, pàmwè. Nwamònu's, Mfùmù Nzambi, Mfùmù Tèòfàní, Mfùmù Yesù. "Yèyè ùdì Mfùmù wa bamfùmù."

Byònsò mbitwilàngàne, ànu mùdì musùkà, mubidi, ne nyumà, byònsò bìdì bilwa bwà kwenza cintu cimwè.

⁹⁷ Kàbìdì, Yèyè ùdì Taatù, ùvwa wa kumpàla awu; Mwànà; ne Nyumà Mwimpè, Nyumà awu.

"Mfùmù wa bwakànè," cyambiibwà cyà Nyumà; tèòfàní, "Mfùmù wa—wa ditalala," tèòfàní; ne mu mubidi emu Yèyè ùvwa "Mfùmù wa bamfùmù," Muntu umweumwe awu.

⁹⁸ Pàdìbì ne tèòfàní awu, Mòsà wàkaMumòna, Ekèsòòdè 33.2, Yèyè ùvwa tèòfàní. Mòsà ùvwa muswè kumòna Nzambi. Ùkaavwa muumvwe dìyì Dyèndè, muMuumvwe wàkula nendè, muMumòne mu kaacipuka mwàmwa, bu Dikunji dinène dyà Kapyà. Ki yèyè kwamba ne: "Wèwè udi Nganyì? Ndi muswè kumanya ne Wèwè udi Nganyì." Ke mwàkambà Mòsà. "Nèntèekè. . ." "Bu Wèwè mwà kwenza bwà nKumònè, ndi muswè mmonè mpàla Webè."

⁹⁹ Yèyè kwamba ne: “Muntu nànsha umwe kèna mwà kumòna kwísù Kwànyì to.” KwambaYè ne: “Nènteekè cyànza Cyànyì pa mèsù èbè, ne nèmpicilè ku luseke. Nènku wèwè udi mwà kumòna nyimà Wanyì, kàdi kī mpàla Wanyì to.” Nwamònu anyi? Nènku pààkenzàYe nànkù, cìvwa nnyimà wa Muntu; cìvwa n’tèòfànì. Dìbà adi Dìyì dyàkalwà kùdi Mòsà adi ne: “NDI,” aci cìvwa n’Dìyì. Dìyì dyàkalwa kùdi Mòsà mu mmwènekèlu wa Dìkunji dyà Kapyà mu cipuka cìvwa cìlakuka kapyà, “NDI.”

¹⁰⁰ Bu mùdi Dìyì dyà ku tèòlòjì, dyà kùdi tèòfànì’s wè, mfwilaayikù luse, Wàkalwa kùdi Abraham bu Muntu, mwinshì mwà mucì wà lusànga. Mpindyewu tàngilàayi kuntwaku. Kulwakù Muntu kùdi Abraham, búsàtù bwàbò, ne kusòmbabò mwinshì mwà mucì wà lusàngà, búsàtù bwàbò. Nènku mònaayi, paanyimà pàà Yèyè mumanè kwakula ne Abraham . . .

¹⁰¹ Yèyè wàkalwa bwà cinyì? Abraham, mwikàle ewu uvwa ne mulayi ne mukenji wa mwànà wa balùme uvwa ne cyà kulwa awu, ne yèyè uvwa kàbidì mupròfetà-Dìyì dyà Nzambì uvwa mweyemène Dìyì dyà Nzambì awu, mwikàle ùbiikila cintu cyònsò cìvwa cibèngangana bu ne kacìvwakù to. Nudi numòna mùdi Dìyì dipwàngàne anyi? Dìyì òvwa dilwa kùdi mupròfetà. Nwamònu’s, kùvwa Nzambì mu tèòfànì. Ne Bible mmwàmbe ne: “Dìyì dìdi òlwa kùdi mupròfetà.” Kàdi awu ùvwa—Dìyì adi mu tèòfànì.

Mpindyewu wèwè udi wamba ne: “Awu ùvwa n’Nzambì anyi?”

¹⁰² Abraham wàkamba ne ùvwa Nzambì. Kwambayè ne òfànì Dyèndè ùvwa . . . wàkaMubiikila Elohim. Mpindyewu, mu Genèsè 1, nudi nujandula ne: “Ku cibangidilu *Elohim* wàkafùka maulu ne buloba.” Mu Genèsè 18, tуди tujandula ne—ne Abraham wàkabiikila Muntu uvwa musòmbe mwaba awu ne kuyiikila nendè, ne ùvwa mwà kumwambila maalu masokome à mu mwoyi wèndè, kumwambila bivwà Sarah wèla meeji paanyimà Pèndè, Abraham kwambayè ne: “Ng’Elohim.” Ùvwa mu mmwènekèlu wa tèòfànì. Nwacyùm vù anyi? Mònaayi paanyimà pàà . . .

¹⁰³ Mpindyewu tуди tujandula ne Yèyè ùvwa òfànì adi mu mmwènekèlu wa tèòfànì. Yèyè wàkaMubiikila ne: “Mukalenge Nzambì, Elohim.” Mpindyewu, mu Genèsè 18, tуди tusangana ne aci ncilelèlè.

¹⁰⁴ Mpindyewu mònaayi, Abraham . . . Bàvwa búsàtù bwàbò pàmwè, kàdi pàakatwilanganà Abraham ne bàsàtù abu, yèyè wàkamba ne: “Mukalenge Wanyì.”

Kàdi pàvwà Lotà, mu Sodoma; bàbidì bàà kùdìbo kupwekabò kuntwaku, ki Lotà kumònayè bàbidì bààbò bènda bàlwa, ki yèyè kwamba ne: “Bakalenge bàànyì.” Nwamònu’s, bwalu òvwa cinyì? Cyàkumpàla, Lotà kàvwa mupròfetà to, ncyà bushùwà, anyi kàvwa mùsànjeelà wa òfànì adi to, pa

nànkú yéyè kàvwa ne dibuulula dyà kùdìYe to. Ncyà bushùwà menemene. Lotà ùvwa mwà kubàbìikila ne “bakalenge.” Dikumi ne bàbìdì bajimà, ùvwa ànu mwà kwamba ne: “bakalenge.”

Kàdì nànsha byôbì ne Abraham ùvwa mumòne búngì kaayi, Cìcìvwa ànu Mukalenge umwe. Ki Nzambì nyáwù. Ewu ùvwa m’Melekisedekè awu.

¹⁰⁵ Mònaayi ne, paanyimà pàà mvità mimanè kujika, Melekisedekè wàkapèèsha mwan’Èndè mucimunyi awu nkòomunyò; anji elàngànàayi meeji pa bwalu abu, citùpà cyà Yéyè mwine! Mpindyewu tudi baswè kumòna mwab’ewu. Mu cifwànyìkijilu ncyôci eci, cimwènèke patòòke, mèèsà à Mukalenge. Paanyimà pàà mvità, Yéyè wàkadifila Yéyè mwinè, bwalu mèèsà à Mukalenge àdì citùpà cyà Kìlistò. Ne paanyimà pàà mvità mimanè kujika, paanyimà pàà wèwè mumanè kutuuciibwa mfimbù, ke dībà dyúdi ulwa citùpà cyà Kìlistò ndyòdi adi, ulwa citùpà cyà Kampànda ewu. Nwácyümvù anyi?

¹⁰⁶ Yakòbò wàkalwangana mvità yà bibùlà bufükù bujimà, kàdì kàyi muswè kuMulekelela pàdìYe kàyi mumubènèshe to. Ncyà bushùwà. Mulwàngàne mvità bwà Mwoyi! Ne paanyimà pàà mvità mimate kujika, dībà adi Nzambì ùdi ùkupèèsha Yéyè mwinè. Ki nkòomunyò Wendè mulelèlè nyéyè awu. Kaadyàmpà kakesè ne cyostiyà bìvwa ànu bìCìleeja. Kùvwa mwà kumwàngata paùvwa kùyi mulwàngàne mvità bwèndè nànsha ne mushàale citùpà cyà Nzambì.

¹⁰⁷ Vùlukàayi ne, pa dībà edi, mèèsà à Mukalenge kàvwa mánji kujaadikiibwa to, kí ntoo ne ku lufù lwà Yesù Kìlistò to, nkàmà ne nkàmà ne nkàmà yà bidimu paanyimà.

¹⁰⁸ Kàdì Melekisedekè, paanyimà pàà mwàna Wendè Abraham mumanè kupeta bucimunyi, Melekisedekè wàkatwilangana nendè ne wàkamupèèsha mvinyò ne dyàmpà; bileeja ne paanyimà pàà mvità yà pa buloba eyi mimate kujika, netùtwilanganè Nendè mu mauu ne netwàngatè cyàkàbìdì mèèsà à Mukalenge. Necìikalè Didya dyà Dìbanji. “Mémè ncyàkunwà kàbìdì mvinyò ewu, anyi kudyà tumuma, too ne pàNgàatùdyà ne kumunwà neenu, cyàkàbìdì, mu Bukalenge bwà Taatù Wanyi.” Ncyà bushùwà anyi?

¹⁰⁹ Mònaayi kàbìdì ne, Melekisedekè wàkaya bwà katwilangana ne Abraham kumpàlà kwà kwalukilayè kumbèlu. Cimfwànyì cilenga kaayipu citùdì naaci kaaba aka’s wè! Melekisedekè wàkatwilangana ne Abraham kumpàlà kwà kwalukilayè kumbèlu, paanyimà pàà mvità.

Tudi tutwilangana ne Yesù mu mpeepèlè, kumpàlà kwà twètù kwalukila Kumbèlu. Ncyà bushùwà. Tesàlònìkà Mwibìdì ùdi ùtwàmbila cyôci aci, bwalu: “tudi tutwilangana Nendè mu mpeepèlè.” Cimfwànyì cilenga cyà Leebèkà ùtwilangana ne Izàkà, mu budimi, mu citaleela cyà ditùkù adi. “Tudi tutwilangana Nendè mu mpeepèlè.” Tesàlònìkà Mwibìdì ùdi

ùtwàmbila nàнку. “Bwalu twètù bàdi ne mwoyi ne bashààle katwàkupangisha anyi kupùmbisha aba bàdi balààle to; bwalu mpungi wa Nzambi neàdilè; bafwè mu Kilistò nebàbiikè dyàmbedi; twètù bàdi ne mwoyi ne bashààle netwàngaciibwè muulu pàmwè naabò, bwà katwilangana ne Mukalenge mu mpeepèlè.” Bipwàngàne, bimfwànyì byònsò ebi.

¹¹⁰ Ki bwà cinyì, tèòfàní awu, pawikalà mufwè ne mubwelè mu tèòfàní awu, (cìdi cyènzekà ncinyi?) tèòfàní ùdi ùlwa pa buloba bwà kwambula mubidi mupikula awu. Nènku pawikalà apa mu mpeepèlè emu, udi wangata mubidi bwà kutuutakeena ne tèòfàní, ki bwalu mbwòbù abu’s, “ne kwangaciibwa muulu, bwà kuya katuutakeena ne Mukalenge mu mpeepèlè.”

¹¹¹ Melekisedekè ewu nganyi’s pìikalàyi kàyì Nzambi!

¹¹² Mpindyewu tudi tumòna kaaba aka bitòòke tòò munsokontu wònsò wa myoyi yètù mu lwendu, ne lufù, ne kutùdi tuya paanyimà pàà twètù bamanè kufwà. Kàbìdi, didyanjila-kulongolola ndimwènèshìibwe patòòke kaaba aka. Mpindyewu tèèlejààyi patùdi tulongesha cyòci eci apa, ne ntèmà yònsò.

¹¹³ Bitùpà byà—byà kiipàcilà kàà Cyendèlèlèlè kàvwàYe naaku mu mùnsokòntù Wèndè aku nkabuulùdìibwe mpindyewu. Mònaayi ne, kùcìdi ànu bitùpà bisàtù bwà bupwàngàne. Ànu mùdiYe ùpikula buloba, ke mùshindù wùm wèwùm wè ùdiYe ùpikula Èkéleziyà Wèndè, Yèyè ùdi ùpikula bantu, mu bitùpà bisàtù. Mpindyewu tàngilààyi. Cyàkumpàla ndibingishiibwa, bu mwàkayiisha Luther; ciibìdi, dijidiibwa, bu mwàkayiisha Wesley amu; ciisàtù, dibàtiiza dyà Nyumà Mwímpè. Ncyà bushùwà. Pashiishe Dyambwibwa dilwalwa!

¹¹⁴ Mpindyewu, buloba, mmunyi mwàkapikulàYe? Cyàkumpàla, cyàkenzàYe, pààkenzàbù mpèekaatù, Yèyè wàkabùsukula mu dibàtiiza dyà mu màyi. Ncyà bushùwà. Pashiishe Yèyè kumacishapù Mashi Èndè, ùmukila ku nkùrusè, ne kubùjidila ne kubùbiikila ne Mbwèndè Yèyè. Nàнку dibà adi Yèyè ùdi wènza cinyi? Bu mwàkasùnsulàYe maalu ònsò à pa buloba munda mwèbè, ne kuvwija bintu byònsò bipyabìpyà ku dibàtiiza dyà kapyà kàà Nyumà Mwímpè, Yèyè neàvwijè kàbìdi buloba bupyabùpyà. Nènku nebwòshikè butubutu ne Kapyà, ne kukezula kishì kònsò, mu butùmbùke bwà kilòmèetà miliyò ne miliyò, cintu cyònsò necìikalè cikezùdìibwe. Nènku dibà adi kùdi Dyulu Dipyadìpyà ne Buloba Bupyabùpyà, ànu mùdi cifùkùibwà cipyacipyà mu Kilistò Yesù pàdi Nyumà Mwímpè wèla ùkupyà. Nwamònu’s, ki bwalu mbwòbù abu’s, cintu cyònsò mu kaabujimà ncitòòke ànu tòò ne mwàci mwònsò. Byònsò bìdi mu isàtù.

¹¹⁵ Dilediibwa dyà mu bufùki dìdi mu isàtù. Cintu cyàkumpàla cìdi cyènzekelà mukàji udi pa lulèlu ncinyi? Cìdi cibwayika dyàmbedi ncinyi? Màyi. Cìdi cibwayika pashiishe ncinyi? Mashi. Cìdi cìlonda pashiishe ncinyi? Mwoyi. Màyi, mashi, nyumà.

Cìdì cyènzekelà cikùnyìbwa ncinyi? Cìdì cibola. Cintu cyà kumpàla ncinyi? Cìkolakola. Cìdì cilondà ncinyi? Mwepu. Cìdì cilondà ncinyi? Cizubu. Pashìishe lutete, nwamònu's, lùdì lùpàtuka mu cyòci aci. Ànu bitùpà bisàtù byà cyòci aci, too ne mwàfikaci ku lutete. Aci's mmwómò menemene.

116 Nzambì ùtu ùshìndika aci. Aci's citu misangu yònsò ànu cilelèlè. Nzambì ùdì ucìshìndika ne ncilelèlè. Ùleeja patòòke ne, ànu badyànjila kulongolola ke bàdì bàbadiibwa mu bupikudi. Nuvwa bacyùmvwè anyi? Lekèlaayi ncyàmbè kàbìdì. Badyànjila kulongolola ànu bòbò ke bàdì bàbadiibwa mu bupikudi. Bantu mbafwànyine kwikala benza maalu bu, beela meei ne ke cìdìbo, kàdì bupikudi bwà cyà bushùwà mbwà bàdì badyànjila kulongolola abu. Bwalu, mwákù mene *kupikula* wùdì wùmvwija ne “kwaluja.” Ncyà bushùwà anyi? *Dipikudiibwa* ncintu kampànda. . . *Kupikula* cintu kampànda, mbwena kwamba ne, “kucyàluja pa kaaba kààci kàà ku cibangidilu aku.” Àlèluuyàh! Pa nàнку ànu bàdì badyànjila kulongolola mbààlujidiibwà, bwalu bakwàbò abu kabàvwa bafuminàKu to. Nwamònu's, “kupingaja!”

117 Mwikàle wa Cyendèlèlèlè pàmwè Nendè, ku cibangidilu. . . Mwoyi wà Cyendèlèlèlè wùvwà naawù awu, meei Èndè à cyùvwà aci, ànu, Yèyè ùvwa muswè bwà wèwè ku. . . Ùvwa muswè bwà mèmè kwimana mu cyambilu, twànji kwamba. Ùvwa muswè bwà wèwè kwikala musòmbe mu nkwasà dilòòlò edi. Dìbà adi tudì munkaci mwà kukùmbaja kiipàcìlè Kèndè kàà Cyendèlèlèlè. Ne ewu wàkuumuka kumbèlu awu, wàkalwa ànu pa buloba bwà kukùmbaja kiipàcìlè Kèndè awu's. Ncyà bushùwà anyi? Èyo. Dìbà adi, paanyimà pàà kumanè kujika, cidi cyàlukila mu ngiikàdìlù mutùmbishìibwe; ncimanè kuboba ne cyalùjidiibwe cyàkàbìdì.

118 Kabyèna bikèmesha to pàvwà Pòlò mufwànyine kwamba, pàvwàbo munkaci mwà kwibaka cishipeelu bwà kumukòsa mutù; yèyè kwamba ne: “Wèwè lufù, kalonda kèèbè kàdì penyi? Wèwè lukità, bucìmunyi bwèbè bùdì penyi? Kàdì twasàkidila kùdì Nzambì Udi utùpèèsha bucìmunyi awu!” Kwambayè ne: “Wèwè lufù, ngambìlaaku tǔng mwaba ùdì mwà kungelesha mikunda! Wèwè lukità, ngambìlaaku mùshìndù uwàndamà's! Bwalu, ndi nè Mwoyi wà Cyendèlèlèlè.” Amen! Yèyè wàkacìjingulula. Lufù, ifernò, lukità, cintu nànsha cìmwè kacìvwakù mwà kumulama to. Ne cintu nànsha cìmwè kaciyèna mwà kutwenzela bibì to, tudì ne Mwoyi wà Cyendèlèlèlè! Wàkajingulula ne ùvwa mubèneshìibwe ne Mwoyi wà Cyendèlèlèlè.

119 Ànu mùdì dimata dikesè dyà lumuma. Bu mèmè mwà kuumvwa, dìdì. . . Ncyèna mutàmbe kumanya bikolè maalu à mwengùngù mapite bùngì to. Kàdì, bìdì mwà kwikala ne cìdì di—dikwàtakana dyà citeleela anyi cyuyuyà. Kàdì pàdì mashika enza bufùkù ne mifitù yilwa, lùdì lùkulukila mu maulu ne

lùmata pa buloba. Nduumatè lùfùmina mwaba kampànda. Kàdi pàakacyàbu mu dindà kumpalà kwà dībà kupàtukadi, ndyàdi dilààle mwaba awu, kakwàcikwètù aku, kènda kàzakalala. Kàdi lekèla ànu dībà dībandè, tàngilà ùmonè mùdidi dībanga kwengelela. Didi ne disànka. Bwà cinyi? Dībà nedidibìikilè bwà kwalukila buludì kùdidi difùmine aku.

Nènku ke mùshindù wùdìbi bwà mwena Kilistò ngwòwò awu. Àlèluuyàh! Tudi bamanyè ne patùdi tubwela mu Bwikadi bwà Nzambi, cintu kampànda munda mwètù cidì citwàmbila ne tudi tufùmina ku mwaba kampànda, ne tudi twalukila cyàkàbìdi ku Bukolè bùdi bütükòka abu.

¹²⁰ Kaadimata kakesè kàà lumuma aku, kàdi kàbàlakana ne kèngelela ne kèèla mbilà, bwalu nkamanyè ne kàdi kàfùmina muulu mwàmwa, ne dībà adi nedikàkòke dikààluja muulu cyàkàbìdi.

Ne muntu udi cyambiibwa cyà Nzambi, mulela kùdi Nzambi, mmumanyè ne, àlèluuyàh, pàdiye ùtwilangana ne Mwànà wa Nzambi, yèyè neàkokiibwè muulu ùmuka pànwapa dīngà ditùkù. “Bwalu mèmè mwambwibwe muulu mmuumùshìibwe pa buloba, nenkokè bantu bònsò kùNdi.” Amen!

¹²¹ Mpindyewu, mònaayi ne, mpindyewu tudi tumòna Melekisedekè ne bwà cinyi Màriyà kàvwa mmamwèndè Yèyè to. Ki bwà cinyi Wàkamubìikila ne “mukàji,” kī nnè *maamù* to. “Yèyè kàvwa ne taatù to,” bwalu Yèyè ùvwa Taatù, Taatù wa kashidi, bàsàtù abu mu Umwe. “Yèyè kàvwa ne maamù to,” nànsha kakesè. Kàvwa ne taatù to, bwalu Yèyè ùvwa Taatù. Mwàkambà mwedi wa kasàlà musangu kampànda, wàkula ùtwa Yesù makùmbù manènè, wàkamba ne:

NDI wàkaakula ne Mòsà mu cipuka cìvwa
 cilàlukà kapyà cyà Kapyà awu,
 NDI Nzambi wa Abraham, Mùtootò wùdi
 Wùbàlakanà wà mu Dindà awu.
 NDI Alpha, Omega, cibangidilu ne ndekeelu.
 NDI bufùki bujimà, ne Yesù ke Dìnà adi. (Ncya
 bushùwà.)

Kaa, nwènù nudi nwamba ne Mèmè ndi nganyi,
 kàdi bàdi bàmba ne Ndi mmulwilè penyì,
 Nudi bamanyè Taatù Wanyì, anyì nudikù mwà
 kwamba Dìnà Dyèndè anyi? (Àlèluuyàh!)

¹²² Ke Dìnà dyà Taatù ndyòdi adi! Èyowà: “Ndi mulwè mu Dìnà dyà Taatù Wanyì, kàdi nwènù kanwèna nuNgaakidila to.” Nwamònu anyi? Bushùwà, Yèyè ùdi umweumwe awu makèèlèlè, leelù, too ne kashidi.

¹²³ Nènku Melekisedekè ewu wàkalwa mubidi. Wàkadìbuulula bu Mwànà wa muntu pàakalwàYe, bu Mupròfetà apu. Wàkalwa mu mènà àsàtù à Mwànà: Mwànà wa muntu, Mwànà wa Nzambi, Mwànà wa Davidi.

¹²⁴ PàvwàYe pànu pa buloba, Yèyè ùwva Muntu, bwà kuuja Mifundu. Mòsà wàkamba ne: “Mukalenge Nzambi wenù neàjuulè Mupròfetà mufwànàngàne naanyi.” Pa nàнку bivwa bikèngela bwà Yèyè àlwe bu Mupròfetà. Yèyè kàwva, kàakambakù ne: “Mémè ndi Mwànà wa Nzambi to.” Yèyè wàkamba ne: “Mémè ndi Mwànà wa muntu. Udi witabuuja Mwànà wa muntu anyi?” Bwalu, ki civwà cikèngelà bwà Yèyè kufidila bujaadiki ncyòci aci, bwalu’s ke civwàYe.

Mpindyewu Yèyè mmulwè mu dikwàbò Dìnà dyà mwànà: Mwànà wa Nzambi, udi kàyì ùmwènèka awu, Nyumà awu.

Ne pàalwàYe cyàkàbidi, Yèyè ùdi Mwànà wa Davìdi, bwà kusòmba pa nkwasà Wendè wa butùmbi.

¹²⁵ Mpindyewu pàvwàYe pànwapa ne kuvwijiibwàYè mubidi, Wàkabìikidiibwà ne: “Mwànà wa muntu.” Mpindyewu, Yèyè wàkaDimanyisha bìshi kùdi bàà pa buloba bu Mwànà wa muntu, Mupròfetà awu?

¹²⁶ Dìngà ditùkù mvwa ndonda bwalu–bulonda bwà Peetèlò ne Andèlè, mwanààbò awu. Bàvwa balòbi, ne tatwàbò Yona awu ùwva mwena kwitabuuja munène wa kale. Dìngà ditùkù kwambabò ne wàkasòmba ku luseke lwà bwàtù. Yèyè kwamba ne: “Bànà bàanyi, nudi bamanyè mutùvwà basambìle patùvwà tukèngela mishipa.” Bàvwa balòbi bapàanyi bàà mishipa. Yèyè ne: “Tudi beeyèmene Nzambi, Yehowàh, bwà kudyà ne kuvwàla kwètù. Kàdi nyèwù nngènda nkùlakaja mpindyewu; ncyèna mwà kushàala neenù ntàntà mule to. Ne ntu misangu yònsò ànu, bu beena kwitabuuja balelèlè bònsò, ntu ànu mwindile cikondo cyàlwà Maasiyà awu. Tudi bapetepète bantu bàà mafi bàà mishindù yònsò, kàdi nekùlwe Wa cyà bushùwà, dìngà ditùkù.” E kwambayè ne: “Pàlwà Maasiyà ewu, ncyèna muswè bwà nwènù bànà bàanyi bàà balùme kuseswishibwà nànsha. Maasiyà ewu kàakwikala ànu mwena tèlòlòji to. Yèyè neikalè Mupròfetà, bwalu mupròfetà wetù Mòsà, utùdi tulonda awu, yèyè ngwàkamba.”

Mpindyewu, mwena Yudà kanà yònsò neitabuuje mupròfetà wendè. Yèyè mmulongèshibwe bwà kumanya cyòci aci. Nènku mupròfetà yèyè mwàmbè cintu kampànda cyà nàнку, dìbà adi’s mbulelèlè. Kàdi Nzambi wàkamba ne: “Kwòkò kwikalè muntu munkaci mwènù, wa nyumà, anyi mupròfetà, Mémè Mukalenge nènDimanyishè kùdiye. Ne cidiye wàmba aci cyòci cyènzeke, dìbà adi mutèlèlèjaayi ne nùmuciinè; kàdi kabiyi nàнку to, dìbà adi kanùmuciinyikù to nànsha kakesè.” Nwamònu anyi? Pa nàнку aci’s civwa n–ncishindiki cyà mupròfetà awu.

¹²⁷ “Pa nàнку Mòsà ùwva bulelèlè mupròfetà mushindika, ne yèyè wàkamba ne: ‘Mukalenge Nzambi wenù neàjuulè, munkaci mwènù, munkaci mwà bànà bèènù, Mupròfetà mufwànàngàne naanyi. Ne bònsò bààbènga kuMuumvwa abu nebùumushiibwè munkaci mwà cisàmbà.’” Yèyè kwamba ne: “Mpindyewu, bànà,

nwavùlukaayi, ne, twètù bu beena Ebèlù, tudi twitabuuja bapròfetà bashìndika kùdi Nzambì.”

Mpindyewu tèelejàayi ne ntèmà. Kacinùpicikù to. Ki yèyè ne: “Pààlwà Maasiyà, nenùMumanyè, bwalu Yèyè neikalè Maasiyà-Mupròfetà. Mpindyewu, bàakamba ne kùkaadi bidimu nkàmà yinaayi. Katwèna bapetè mupròfetà kacya ku Maalàki to, kàdi Yèyè neikalèku.”

¹²⁸ Dìngà ditùkù, paanyimà pàà lufù lwèndè, ndambù wa bidimu, mwanèndè wa balùme Andèlè ùvwa wènda unyùnguluka ku mwelelu wà màyi aku. Ke kuumvwayè muntu wa mu cisuku mupàtùke mu cipèèlà, wàmba ne: “Maasiyà awu mmwimàne munkaci mwènù mpindyewu!” Mukankù munène wàkakolèlà mu cipèèlà awu ne kubùùkawù mwaba awu, kwambayè ne: “Maasiyà ùdi munkaci mwènù mpindyewu mene. Katwèna ànu bânji kuMumanya to, kàdi Yèyè mmwimàne munkaci mwènù. Mémè nèmMumanyè, bwalu Némmonè cimanyinu cífumina mu Dyulu.”

Dìngà ditùkù kwambayè ne: “Mònaayi, Mwànà wa mùkòòkò wà Nzambì udi umusha mpèkaatù wa bàà pa buloba!”

Ke muntu ewu kuya . . . kuyayè bwà kapeta mwanààbò wa balùme. Yèyè kwamba ne: “Simonà, ndi muswè ùlwe apa; twàmanyi kupeta Maasiyà awu.”

“Kaa, ndàaku, Andèlè! S’udi mumanyè cìdi cìmpè kutàmba aci!”

“Kaa, ndi mumanyè. Kàdi, aci, ewu Muntu mmushìilàngàne.”

“Yèyè ùdi penyì? Mmufùmìne penyì?”

“Yesù wa mu Nazalèètà.”

“Kaacimenga kakesè, kàà lwonji aku? Mòna’s, Yèyè kàvwa mwà kufùmìna mu mwaba wà lwonji, wà manyaanù wà mùshindù awu to.”

“Wèwè lwàkù ànu ùmonè’s.”

¹²⁹ Ndekeelu wa byònsò kumuswìshishayè bwà kupweka dìngà ditùkù. Pa nàнку pààkabwelàye kumpalà kwà Maasiyà ewu, Yesù mwimàne mwaba awu, wàkula ne bantu. Pàakaseemenàye kumpalà Kwèndè, kwambaYè ne: “Dìnà dyèbè n’Simonà, ne udi mwànà wa Yona.” Aci kukòsaci bwalu. Yèyè nguvwa ne nsapì yà Bukalenge. Bwà cinyì? Ùvwa mumanyè ne Muntu awu kàvwa mumumanyè to. Kàdi mmunyi mwàkamumanyàYe, ne taatù wa difwàna dyà Nzambì wa kale uvwa mumulongèshe mwà kwitabuuja Maasiyà awu?

¹³⁰ Kùvwa muntu mulùme mwimàne mwaba awu, dìnà dyèndè Filipò. Kaa, ki kusalukayè bikolè! Ùvwa mumanyè muntu mukwàbò, ùvwaye munkaci mwà kulonga nendè Bible. Ke yèyè uyààya wàwa, ku luseke lwà kakùnà, ne kumusanganayè

pambèlu apu mwinshì mwà mucì wèndè wà olivà. Ûvwa mutwè binù panshì, ùsambila. Bàvwa balonge cyàpàmwè màleesònà àbúngì à mu Bible. Pa nànkù ki kupàtukayè kuntwaku ki kwambayè, paanyimà pàà yèyè mumanè kujikija kusambila, kwambayè ne: “Lwákù, ùmonà Utùdì bapetè; Yesù wa mu Nazàlèetà, mwànà wa Yözefù. Yèyè’s ke Maasiyà utùdì bindìle awu.”

Mpindyewu ndi mwà kuumvwa Natànàèlà wàmba ne: “Mpindyewu, Filipò, kwèna mulalùke muyè too kule to, mmwômò anyì?”

¹³¹ “Kaa, to. Bwálà. Mpindyewu lekèlà nkwambilè. Udi mumanyè’s, tudì tulonga Bible pàmwè, kàdi cyàkambà mupròfetà ne Maasiyà ùvwa mwà kwikala cinyi?”

“Yèyè ùvwa mwà kwikala Mupròfetà.”

“Udi muvùlùke mulòbi wa kale wùvwa musùmbe mishipa, uvwa kàyì mulonge kàlaasà kakùmjàne bwà kufùndàyè dìnà dyèndè to, ùbìkidiibwa ne Simonà awu anyì?”

“Èyo. Uh-huh.”

¹³² “Yèyè wàkalwa. Kàdi udi mumanyè mùdì bwalu anyì? Yesù wa mu Nazàlèetà ewu wàkamwambila ne dìnà dyèndè ùvwa n’Simonà, kushintulula dìnà dyèndè kùshàaladi Peetèlò, mbwena kwamba ne ‘dibwe dikesè’ ne kumwambila ne tatwèndè ùvwa nganyi.”

“Èè,” mwàkambaye—mwàkambàye, “ncyèna mumanyè to. Cintu cìmpè ncifwànyìnekù kupàtukila mu Nazàlèetà anyì?”

¹³³ Yèyè kwamba ne: “Katùbwakùdì to; wèwè lwákù ànu ùmonè.” Alu’s ke lungenyi lwìmpè ne: “Lwákù ùmonè.”

Ke Filipò ulwàlwa ewu, mutwàle Natànàèlà. Nènku pààkajuukàye kuulu, pàmwàpa Yesù mwimàne, wàkula, pàmwàpa mwikàle ùsambidila babèèdì mu mulongo wà babèèdì. Nènku pààkafikàye mwaba wùvwa Yesù ùsanganyiibwa awu, Yesù kumutàngilaYè, e kwamba ne: “Mònaayi mwena Izàlèèlà mwena munda mùdì kamùyì budimu.”

¹³⁴ Mpindyewu, wèwè udi wamba ne: “Èè, cìvwa nku mùshindù ùvwayè muvwàlè’s.” Kaa, to. Beena ku esètè bònso bàvwa bàvwàlè mùshindù wùmwèwùmwè. Ûvwa mufwànyìne kwikala mwena Suuliyà, anyì kwikala cintu cikwàbò kanà cyònsò; ne mwedi, cìwalu.

¹³⁵ Yèyè kwamba ne: “Mònaayi mwena Izàlèèlà mwena munda mùdì kamùyì budimù,” mu mùshindù mukwàbò, “muntu wa kweyemena, wa meeji matòòke.”

Èè, aci’s kàdi ke kupàtulaci Natànàèlà lupeepa’s. Ki kwambayè ne: “Laabi,” mbwena kwamba ne, “mulongeshi.” “Laabi, Wèwè ukààdikù mummanyè dibà kaayi? Wàfikì ku

dimanya ne ndi mwena Yuda munyi? Wafiki ku dimanya ne mvwa muntu wa kweyemena, ncyyi ne budimu bishi?"

¹³⁶ Yeye kwamba ne: "Kumpala kwa Filipò kukubiikilaye, paüvwà mwinshi mwà mucu apu, Mème mvwa mukumòne." Uh! Mu ntàntà wa kilòmèètà makùmi àbìdì ne yìnaayi, ku luseke lukwàbò lwà ditungà alu, ditùkù òvwà didyànjidile adi.

Cyäkambàye ncinyi? "Laabi, Wèwè udi Mwànà wa Nzambi. Wèwè udi Mfùmù wa Izàlèlèl!"

¹³⁷ Kàdi's ki baakwidi abu kacya biimàne mwaba awu, badyambi, bàà buumàkàne, kwambabò ne: "Muntu ewu m'Beelèzèbùlà, mwena lubùku."

Yesù wàkamba ne: "Nènnüfwilè luse bwà aci."

¹³⁸ Mpindyewu, vùlukàayi ne, kacya kabàvwakù bacyàmbè ne diyì dikolè to, kàdi bàakacyàmba mu myoyi yàbò. "Ne Yeye wàkajingulula meeji àbò." Ncyà bushùwà. Ke cidì Bible wàmba ncyòci aci. Cibiikilaayi ne *ndubùku* panwikalà baswè kucibiikila, kàdi Yeye—Yeye wàkajingulungulula meeji àbò.

¹³⁹ Ki Yeye kwamba ne: "Ndi nnüfwila luse bwà aci. Kàdi dīngà ditùkù Nyumà Mwimpè nealwe ne neenzè cintu cimwècimwè eci," paanyimà pàà diya Dyèndè; "kwamba diyì dibi bwà Cyòci aci, kakwàdyàkufwidiibwakù luse mu eci cikondo anyi mu cikondo cilwalwà to." Ncyà bushùwà anyi? Mpindyewu, abu bàvwa mbeena Yuda.

Pashiishe dīngà ditùkù bìvwa bìkèngela kuyaYè ku Sàmaalèyà.

¹⁴⁰ Kàdi ànu kumpalà kwà twètù kwenza nàнку, tudi basangàne mukàji awu, anyi, muntu awu—muntu awu, pàakapicilàYe ku ciibi cìvwà cibìikidiibwà ne n'Cilenga aci, bwà ne wàkondopiibwa. Ne Yesù kumanya ngiikàdilù wendè, ne kumwambila ne: "Ambùlà kalààlù kèèbè ne alùkila pambèlu." Nèнку wàkenza nàнку, e kusàngalayè.

Pashiishe tudi tujandula ne, beena Yuda, bàmwè bàà kùdìbo bààkaMwakidila. Bàmwè bààkaciitabuuja; bàmwè kabààkaciitabuuja to. Kabààkaciitabuuja bwà cinyi? Kabàvwa balongolwela Mwoyi to. Kabàvwa citùpà cyà cyambiibwà aci to.

¹⁴¹ Mpindyewu vùlukàayi ne, bôbò abu bàvwa baakwidi ne bantu banène. Nèнку Yesù. . . Anji elàayibi meeji bwà beena tèòlòji ne baakwidi abu tūng, bantu baüvwà kùyikù mufwànyine kupeta cilèmà mu nsòmbelu wabò abu. Yesù wàkamba ne: "Nwènu nudi bàà tatwènu dyabùlù, ne byenzedi byèndè ke binùdì nwenza ebi." Yeye kwamba ne: "Bu nè nuvwa bàà Nzambi, nùнку's nudi baNgiitabùjè's. Panwikalà kanùyì mwà kungiitabuuja Mème to, itàbùjèjaayi bye—byenzedi bìndì Mème ngènga; byòbi mbidi bifila bujaadiki bwà ne Mème ndi Nganyi."

¹⁴² Mpindyewu, Bible mmwàmbè, ne: "Yesù ùdi umweumwe awu makèèlèlè, leelù, too ne kashidi." Yesù wàkamba

ne: “Byenzi bîNdi ngèza ebi ewu udi uNgiitabuuja neabyenzi pèndè.” Ncyà bushùwà anyi? Mònaayi ne, awu ùvwa m’Melekisedekè mulelèlà mpindyewu.

¹⁴³ Mpindyewu mònaayi, kàbìdì ne, kùvwa bisà ànu bisàtù byà bantu.

Nuvwa bangumvwe ngàmba ne mvwa musungulujanganyi. Ke cîndi. Beena Kilistò bônso mbasungulujanganyi; kî ndisunguluja dyà diikala to, kàdi disunguluja dyà nyumà. Diikala dyà dikòbà dyà muntu kaditu nendè ne bwalu to. Yèyè mmwànà wa Nzambì ku Dilediibwa. Kàdi mwena Kilistò, Nzambì wàkamba ne: “Ntápùlwilaayi. . .” “Pàtukàayi munkaci mwàbò. . .” ne bikwàbò. Yèyè’s mmusungulujanganyi, wa bukooya, pankaci pàà cimpè ne cibi.

¹⁴⁴ Kàdi mònaayi ne, bàvwa ne disungulujangana cikondo aci, disungulujangana dyà bisà, ne beena Sàmaalèyà.

Ne kùdi bisà ànu bisàtù byà bantu pa buloba; patwikalà twitabuuja Bible; mbwena kwamba ne, beena Ham, beena Sem, ne beena Yafètè. S’ke bânà bàà Noà bàsàtù mbwòbò abu. Twètù bônso tudi bapàtùkilakù. Ncyà bushùwà. Aci’s cidi citwàluja bônso kùdi Adàmà, ke cidi citwènza bônso bânà bàà muntu. Bible mmwambè ne: “Ku mashi àmwèpelè Nzambì wàkafùka matùngà ònsò.” Tudi bônso bânà bàà muntu, ku musulù wà mashi. Muntu mufiike ùdi mwà kupèèsha muntu mutòoke mashi bwà kumwelabò, anyi ewu anyi wàwa. Muntu mutòoke ùdi mwà kupèèsha mwena—mwena Japon, muntu wa kàlaabi, anyi Indien, muntu mukünze, anyi ní ngwa bishi, anyi mwànà wa Yafètè, anyi ní ncinyi cyònsò, ùvwa mwà kumupà mashi à bamwela, bwalu tudi bônso mashi àmwè awu. Diikala dyà dikòbà dyètù, mwaba ùtùvwa basòmbèlè, kacìvwa ne bwalu to.

Kàdi patùdi basungulùjiiibwe, mpatwàkapàtukà mu maalu à pa buloba, mwàkapàtulàYe Izalèlèlà mu Èjiipitù amu. Ke dîbà ditùdi basungulùjiiibwè ku bintu byà pa buloba ndyòdì adi.

¹⁴⁵ Mpindyewu, bàvwa beena Ham, beena Sem, ne beena Yafètè. Nènku bu ne tuvwakù ne dîbà dyà kwalukidila mu ndelànganyi, nuvwa mwà kumòna Anglo-Saxon awu, kuvwàye mufùmine’s. Mpindyewu, kùvwa mwena Yuda. . . Mwena Sàmaalèyà, uvwa citùpà mwena Yuda ne wa bàà Bisàmbà byà bendè, uvwa musèdiibwe kùdi bàà Bisàmbà byà bendè ku byenzi byà Baalàmà, ne Moàbà awu. Bàvwa mbeena Sàmaalèyà. Ne kùvwa beena Yuda ne bàà Bisàmbà byà bendè.

Mpindyewu, twètù ba-Anglo-Saxons katùvwakù naabi bwalu nànsha bùmwe to. Katùvwakù biitabùuje Maasiyà kampànda, anyi cintu cikwàbò nànsha cìmwè to. Katùvwa bindile nànsha umwe to. Twàkabwejiibwamù pashiishe.

Yesù wàkalwa kùdi bàà Kwàbò Sungasunga, kàdi bàà Kwàbò Sungasunga kabààkaMwakidila to. Ke kwambilaYe bayiidi Bèndè ne: “Kanuyi mu njila wa bàà Bisàmbà byà bendè to, kàdi

ndàayi buludi ànu kùdì mikòòkò mijimine yà Izalèèlà.” Ne Yèyè wàkaya ànu kùdì mikòòkò mijimine yà Izalèèlà. Kàdì tàngilàayi, Yèyè wàkaDimwènesha bu Mwànà wa muntu, kumpàlà kwà beena Yudà. Bòbò kuCidyombola.

Mpindyewu, beena Sàmaalèyà abu, biikàle citùpà beena Yudà ne bàà Bisàmbà byà bendè, bààkiitabuuja pààbò, ne bàvwa bindile Maasiyà.

Katùvwakù twètù nàнку to. Tuvwa bampàngaanù, ne bibwenga paanyimà pèètù, biikale tukuukwila mpìngu; bàà Bisàmba byà bendè.

¹⁴⁶ Kàdì mpindyewu ditùkù kampànda, Yone Munsantu 4, bivwa bikèngela bwà kupicilaYè mu Sàmaalèyà, mu njila Wènda ùpweka mutàngile ku Yelèkò. Kàdì wàkabànda pabwìpì ne Sàmaalèyà. Nènku pàvwàYe wènda ùya kuntwaku apu, Yèyè kusòmba pa ciinà cyà màyi pambèlù pàà cimenga ciwà cibìikidiibwà ne Suukà aci. Nènku ciinà cyà màyi, ní nukààdikù kacya bafikèku, mmwàba mwalàbàla mwenzè ndambù bu mwaba ewu ewu. Ne kùdì mushimi wà bantu bònsò kuntwaku, wà màyi, kùdibo bàlwa bònsò. Nènku bakàji bàlwalwa mu dindà, bàsuna milòndò yàbò yà màyi, ne bàyitenteka pa mitù yàbò, ne mulòndò pa lubèsa mulòndò pa lubèsa, ne bènda naawù balulàme ànu sula, kabàyi bàmacisha dimata nànsha dimwè to; bènda bàyiikidishangana. Pa nàнку, bàvwa mwà, bantu bàvwa mwà kupàtuka pambèlu apu.

¹⁴⁷ Nàнку tuvwa mwà kwikala twipacila ku dîbà dikumi ne umwe wa munda mùnyà. Ke kutùmaYè bayiidi Bèndè mu cimenga, bwà kusùmbakù ndambù wa bintu, byàkudyà's. Nènku pàvwàbò bamanè kuya . . .

¹⁴⁸ Kùvwa mukàji wa luumù lubì, wa, mutùdì mwà kumubiikila, leelù ewu, mukàji wa mu musèèsù, anyi ndumbà. Ùkaavwa ne balùme bapitèpìte bùngì. Nènku pàvwà Yesù musòmbè mwaba awu apu, mukàji ewu kupàtukayè bu pa dîbà dikùmi ne dimwè nàнку. Nwamònu's, yèyè kàvwa mwà kulwa ne bààvirgò abu pàvwàbò bàlwa mu dindàdindà bwà kusunabò màyi àbò à kwowa to; yèyè ùvwa ne cyà kwindila too ne pàvwàbò bònsò . . . Kabàvwa bàsambakana mùdibo bènza mpindyewu ewu emu nànsha. Yèyè ùvwa mutwibwe citampì. Nàнку dîbà adi, wàkapàtuka bwà kupetakù ndambù wa màyi, ki yèyè kwangata mwonji wà kale, ne kwela lukànu ku nzàbà, ne kutwàdija kumupwekesha mwinshì.

Kuumvwayè Muntu kampàndà wàmba ne: “Mukàji, Ntwàdilàkù màyi à kunwà.” Mpindyewu, vùlukàayi ne, ewu's m'Melekisedekè. Ewu's n'Yesù, makèlèlèlà awu, Mwànà wa muntu.

¹⁴⁹ Ki kukènzakanayè, e kumònayè mwena Yudà. Ki yèyè ne: “Mukalenge, kabyèna bikùmbànyine bwà mwena Yudà kulòmbaye mwena Sàmaalèyà cintu to. Mémè ndi mukàji wa mu

Sàmaalèyà, pa nàнку Wèwè udi mupanga wa kulomba. Kabivwa bikèngela bwà Wèwè kundomba cintu bu nàнку to. Katwèna mwà kubobeshila neenù makwenda pàmwè nànsha.”

150 Yèyè kwamba ne: “Kàdi bu wikala mumanyè Mwine uvwa wakula neebè awu, wèwè's nguvwa mwà kundomba Mémè mâyi à kunwà.”

Yèyè ne: “Neùàsunè bìshi? Ciinà ncyàci bulecì, ne Kwèna ne cintu nànsha cìmwè cyà kusuna naaci to.”

151 Yèyè ne: “Mâyi àndi Mémè mfilà adi m'Mâyi à Mwoyi, adi àbànda abwela mu Mwoyi wà Cyendèlèlè.”

Wàkaakulangana nendè too ne mwà kasanganàYe cìvwa lutàtù lwèndè. Ne pashiishe kùdi...Tàngilàayi numòne cyàkamwambilàYe mpindyewu: “Nda ùkangàtè bàyebè ne ùlwe mwaba ewu.”

Ki yèyè kwamba ne: “Ncyèna ne bàyanyì to.”

152 Yèyè ne: “Wàmbì bulelèlè, bwalu ukààvwa naabò bàtaanu, ne ùdi musòmbe nendè mpindyewu awu kí ngwebè to. Pa nàнку, mu cyòci eci, wèwè udi mwàmbè bulelèlè.”

Tàngilàayi dishiilàngana pankaci pàà mukàjì awu ne musumbà wà baakwidi abu. Yèyè ùvwa mumanyè byàbùngì pa bwalu bwà Nzambi kutàmba musumbà mujimà awu, bònsò basanga.

153 Yèyè kwamba ne: “Mukalenge, ndi njingulula ne Wèwè ewu udi Mupròfeta.” Yèyè kwamba ne: “Katwèna bapetè nànsha umwe to kùkaadi bidimu nkàmà yinaayi. Mpindyewu, tudi bamanyè ne Maasiyà ùlwalwa. Ne pààlwà Maasiyà, ke cyènzàYe ncyòci aci.” Aci's cìvwa ncimanyinu cyà Maasiyà, bwalu Yèyè ùvwa Mwànà wa muntu. Yèyè kwamba ne: “Ke cyènzàYe pààlwàYe. Wèwè udi ne cyà kwikala mupròfeta Wendè.”

154 Yèyè ne: “Mémè ki Yèyè awu.” Muntu mukwàbò nànsha umwe kàvwakù mufwànyine kwamba aci to.

155 Kulekelelaye mulondo wà mâyi awu ne kubwelayè lubilu mu cimenga, ne kwàmba ne: “Lwâyi, kanùmonàayi Muntu Udi mungambile cìndi mwenzè. Kí m'Maasiyà mwinè ewu anyi?”

Mpindyewu vùlukàayi ne, Yèyè wàkalaya bwà kwenza cintu cìmwècìmwè aci ku ndekeelu kwà cisà cyà bàà Bisàmbà byà bendè.

Beena Yudà bàvwa ne bidimu binunu binaayi byà dikèba Maasiyà awu, bidimu binunu binaayi byà dilongesha ne Yèyè ùvwa ùlwa, ne cìvwaYe mufwànyine kwenza pàvwàYe ùfika, kàdi bààkapanga kuMumòna, anyì bààkapanga kucìjingulula. Nènku pàkadimanyishàYe mu myàkù mene yà mu Bible yìvwàYe mwàmbè ne neàDìbuulwilèmu ayi, pàvwàYe tèofànì ne pashiishe kushààla mubidi ne kusòmbela munkaci mwàbò, bààkapanga

kucimòna, ne bàakabiikila byenzedi Byèndè ne mbyenzedi byà dyabùlù.

¹⁵⁶ Mpindyewu, tudi bapetè bidimu binunu bibìdì byà dilongesha. Kupweka kupicila mu Èkèleeziyà wa Kàtòlikè wa cyena Loomò awu, paanyimà pàà bàpostòlò. Pashiishe tudi tupweka tucicila mu Kàtòlikè kàà cyena Loomò, kàà cyena Ngelikà, ne bikwàbò, too ne ku cikondo cyà Luther, ne Wesley, ne bikwàbò, malongolodi mashiièshiièlàngàne nkàmà citèemà. Twenda tupweka, bàwwa ne bikondo byònsò ebi, byà dilongesha.

Mpindyewu Yèyè wàkalaya ne, pabwîpì menemene ne cikondo cyà nshiiکیدیلو kulwaci, ne cimfwànyì cyà Sodomà ne Gomòlà cìvwa ne cyà kulwa cyàkàbìdì ne: “Ànu mwàkadibì mu matùkù à Sodomà, ki mwikalàbì kàbìdì ku dilwa dyà cikondo cyà nshiiکیدیلو, Mwànà wa muntu neàDibuulùlè cyàkàbìdì.” [Kàtùpà kàà mukàbà wa mèyì munda mutupù—Muf.]

“Kàdi katancì kakesè aka bàà pa buloba kabàakuMmòna kàbìdì to; kàdi nwènù nenùMmònè, bwalu Mèmè,” mupinganyi muleeji muntu, “Nèngiikalè neenù, munda mwènù mene, too ne ku dikùmbana dyà maalu ònsò, ku ndekeelu kwà buloba. Nèngiikalè neenù.” Yèyè ùdì umwèumwè awu makèèlèlè, leelù, too ne kashidi. Nudi numòna anyì?

¹⁵⁷ Nudi numòna’s, cìvwa mwena Sàmaalèyà awu, mu bushùwà bwà bwalu, kuumukila ku diyiisha dyànyì dyà makèèlèlè dilòòlò awu, ùvwa ng’Hàgà, nwamònu’s, cifwànyikijilu cinyangakaja. Mwena Yudà awu ùvwa n’Sarah, anyì ùvwa mwena Sarah. Kàdi bàà Bisàmbà byà bendè mbàà kùdì Màriyà, Dimiinu dyà Bukalenge, Dimiinu dyà Bukalenge dyà Abraham.

¹⁵⁸ Mpindyewu ncilayiiibwe ne mu matùkù à ndekeelu aa, ne, Nzambì umweumwe ewu, Kilstò umweumwe ewu, ùvwa ne cyà kwalukila apa ne kuDibuulula Yèyè mwinè bu Mwànà wa muntu.

Bwà cinyì? Yèyè ùdì umweumwe awu makèèlèlè, leelù, too ne kashidi. Ne bu Yèyè mwà kwikala mulekele beena Yudà abu bapicilapu, ne. . . ne mubàpèeshe cimanyinu cyà Maasiyà aci, ne pashiishe kufika ku ndekeelu kwà dilongesha dyà bàà Bisàmbà byà bendè ne kubàlekela bàbwelela ànu mu tèlòjì, Yèyè’s mmufwànyìne kwikala mwena kànsungàsùnga. Bikèngela Yèyè ènzè cintu cimwècimwè aci, bwalu Bible mmwàmbè, mu dikumi ne isàt-. . . Ebèlù 13.8 ne: “Yèyè udi umweumwe awu.”

Ne Yèyè mmulayè mu Maalàkì 4, ne Mifùndù mishiièshiièlàngàne yònsò, ne, mu matùkù à ndekeelu, èkèleeziyà ùvwa mwà kwikala musòmbe ànu menemene mùdiyè leelù ewu emu, ne buloba mbufwànyìne kwikala nànkù’s.

¹⁵⁹ Tàngilàayi buloba leelù ewu. Tàngilàayi ngiikàdilù wa Sodomà. Tàngilàayi dikanka dyà buloba mu myaba mishiièshiièlàngàne, ne bintu bìdì munkaci mwà kwenzeka. Tàngilàayi èkèleeziyà ne cimvundù cidìye ùsanganyiiibwamù,

cyà mu Baabùlòònà aci. Tàngilàayi mùsanjeelà wendè, Oral Roberts ne Billy Graham awu.

G-r-a-h-a-m, musangu wà kumpàla wà twètù kupeta mùsanjeelà kampànda, mutùmina maèkèleeziyà ònsò, uvwa dínà dyèndè dìjika ne h-a-m, bu Abraham. A-b-r-a-h-a-m ùdi màleetà mwandamutekète. G-r-a-h-a-m ùdi màleetà àsambòmbò. Yèyè ùdi penyì? Kùdì bàà pa buloba. Ìsambòmbò nnombà wa muntu. Muntu wàkafùkiibwa mu ditùkù diisambòmbò. Kàdi mwandamutekète nnombà wa Nzambì.

¹⁶⁰ Mpindyewu bàtàngilaaayi kuntu kwàka mu Sodomà. Kàdi's ke baamisànjeelà bààbò abu kuntwaku munkaci mwà kwakulangana naabò.

Kàdi dîbà adi Dimiinu dyà bukalenge dyà Abraham adi didi penyì? Cimanyinu cyàbò cyèpì? cyàkambàYe aci ne: “Ànu mwàkadìbi mu matùkù à Sodomà,” mwàkatùulukà Nzambi ne kumwèneshiibwa mu mubidi wa buntu, ne kwamba cìvwà Sarah munkaci mwà kwela meeji munda mwà mwoyi wèndè, mu ntentà paanyimà Pèndè apu: cimanyinu cyà ndekeelu kumpàla kwà bàà Bisàmbà byà bendè kubùtudiibwabù ku kapyà.

Ne Èkèleeziyà mmupetè cimanyinu Cyèndè cyà ndekeelu kumpàla kwà buloba bujimà kubùtudiibwabù, bukalenge bwà bàà Bisàmbà byà bendè ebu kubùtudiibwabù kùdì kapyà ne ciji cicolè cyà Nzambì. Nudi nwitabuuja nàнку awu anyì?

¹⁶¹ Melekisedekè awu ùvwa mubidi, ùDileeja mu mubidi wà buntu; nènku pashìishe Wàkavwijiiibwa mubidi. Nènku mpindyewu, dilòdòlò edi, Yèyè ùdi umweumwe awu, makèèlèlè, leelù, too ne kashidi. Nudi nuciitabuuja anyì?

¹⁶² Melekisedekè ewu nganyì, dîbà adi, ùdi umweumwe awu makèèlèlè, leelù. . . “Kacya kàvwakù ne taatù, kàvwakù ne naamù to; Yèyè kàvwakù ne ntwàdijilu wa matùkù to, Kàvwakù ne ndekeelu wa mwoyi to.” Nènku Yèyè wàkatwìlangana ne Abraham, ne ncimanyinu cyà mùshindù kaayi cyàkenzàYe? Pashìishe pàkavwijibwàye mubidi, Wàkamba ne cìvwa ne cyà kwenzuluka cyàkàbidi kumpàla menemene kwà cikondo cyà ndekeelu. Nudi nwitabuuja nàнку anyì? Mémè ndi nciitabuuja.

Tùsambilàayi.

¹⁶³ Nzambì munanga, mémè ndi ngiitabuuja Mifùndu ne, Wèwè udi mwàmbè ne Udi “umweumwe awu makèèlèlè, leelù, too ne kashidi.” Nènku ne meeji matòòke wònsò mu mwoyi wànyì, Mukalenge, ndi mumanyè ne cintu kampànda cìdi pabwìpì ne kwenzeka. Ncyèna mwà kucimanyisha mu cyòci menemene to. Ndi nciina bwà kwamba ní ncinyì ní ncinyì cyònsò, Mukalenge. Wèwè udi mumanyè mwoyi wà musadidi Webè.

¹⁶⁴ Kàdi misangu bùngì kaayi, munda mwà cikondo paWàkatùmà bintu abi, bantu bàkapanga kubimòna. Muntu

ùtu misangu yònsò ànu ùtumbisha Nzambi bwà cyàkenzàYe, ne wàmba bintu binène byàlwàYe kwenza abi, kàdi ùlèngulula cìdìYe munkacì mwà kwenza. Ke mudibi kàbìdi munda mwà cikondo aci. Bwà cinyi èkèleeziyà wa beena Loomò wàkapangila kumòna Patrick Munsantu bu mupròfetà wa Nzambi? Bwà cinyi bàakashipa Jeanne d'Arc, pèndè ùvwa mu—mupròfetà mukàji, kumwoshabò bu muloji? Taatù, bitu misangu yònsò ànu bipita. Wèwè ucìsokoka ku mèsù kwà beena meeji ne batàlâme. Kabyèna bikèmesha to muWàkambilà baakwidi abu ne: “Nudi nulengeja nkità yà bapròfetà, pèènu nwènu mbàdi babèlemù.” Paanyimà pàà bôbò bamanè kuya, bàdi bàmòna cilèmà cyàbò. Bàdi misangu yònsò bàKukèngesha, Mukalenge, mu mmwènekèlu yònsò w'Udi ulwilamù awu.

¹⁶⁵ Ndi ndòmba, dilòlò edi, Nzambi, bwà musangu mukwàbò ànu wùmwe ewu cyanààna. Maaàlabà tudi balongòlòdiibwe bwà kwikala. . . bwà kuya ku Tucson. Bitùpà bikwàbò byà buloba, bimenga bikwàbò bitùdi ne cyà kuyiishamù abi. Kàdi, Nzambi munanga, nkufwànyine kwikala beenyi kaaba aka dilòlò edi bàtù kacya kabàyiku bânji. . . Bàkaadikù bùmvwè Méyi mayishìibwe, kàdi kacya kabàyiku baDìmòne dimwèneshìibwe nànsha.

Ànu mùmvwà muKùlòmbe ku cibangidilu amu. Pàvwà bayiidi abu, Kelèopà ne mulunda wendè, bafùmìna ku Èmawùsè, biikàle bènda bàya mu njila, ki Wèwè kupàtuka mu kaacipuka ne kubanga kuyiikila naabò, paanyimà pàà dibiikà dyà ku lufù, kubàyiisha. Mòna's, Yèyè kwamba ne: “Bakùtākàne, ne beena myoyi mineeme bujitu. Kanwèna bamanyè ne bìvwa bikèngela bwà Kilistò kukèngayè bintu ebi, pashiishe kubwelayè mu butùmbi Bwèndè anyi?” Kàdi nànsha nàнку kabàvwakù ànu bajingùlùle aci to. Ditùkù dijimà bàvwa bènda pàmwe Neebè, kàdi kabàyi ànu baKumanyè to. Kàdi dilòlò kampànda. . .

Dilòlò kulwadi, bôbò kuKwenzèja bwà kubwela. Pàakabwelabo mu kaacilàala beenyi kakesè aku ne kukàngabò biibi, dîbà adi Wèwè kwenza cintu kampànda ànu muWàkenzà kumpàlà kwà dipoopediibwa Dyèbè dyà pa nkùrusè amu, ne bàakajingulula ne ùvwa n'Kilistò mubiike ku lufù. Mu katanci kakesè Wèwè uvwa paanyimà pàà ridò ne muyè. Ne lùkàsà lwònsò bàakalwa lùbilu kwambila bayiidi ne: “Mukalenge mmubiike ku lufù cyà bushùwà!”

¹⁶⁶ Taatù Nzambi, ndi ngùitabuuja ne Wèwè ucìdi ànu ne mwoyi. Ndi mumanyè ne ki cyùdi Wèwè. Ne Wèwè ukàadi mutùjaadikileci misangu yàbùngì. Udikù ànu mwà kucyènza musangu mukwàbò kàbìdi bwètù twètù anyi, Mukalenge? Twètù bapete ngàsà ku mèsù Kwèbè, swàkù cyènzekèku kàbìdi musangu ewu. Mémè ndi musadidi Webè; aba mbasadidi Bèèbè kaaba aka. Mukalenge, byònsò bìndì mwàmbè kì mbifwànyine kushìmata to. . . Dìyi dimwè cyanààna dyà kùdi Wèwè ndifwànyine kwikala ditàmba àndi mwambè mu malòlò

àtaanu aa, anyi mayiisha àtaanu aa. Mbifwanyine kwikala bipite apu, ànu díyì dimwèpelè dyà kúdi Wèwè. Kwènàku muswè bwà Wèwè kwakula, Mukalenge, bwà bantu bàmanyè ne ndi mubámBILE Bulelèlà anyi? Enzàku nàнку, Nzambi. Ndi ndòmba nùнку mu Dìna dyà Yesù, bwà ewu musangu kàbìdi. Amen.

¹⁶⁷ Mpindyewu, ncyèna mukumanyè to. Ndi mumanyè bàmwè bantu. Ndi mumanyè mwànà wa balùme udi musòmbe apa *ewu*. Ndi mumanyè Bill Dauch udi musòmbe ànu *pààpa wàwa's*. Ndi muswè bwà . . . Mwanèètù Blair nyèyè ewu, Rodney Cox. Mbikolè bwà kumòna kwàka nàka.

Ku *elu* luseke, ànu lwà mpindyewu mene ncyèna mwà kumòna muntu nànsha umwe to, mu bushùwà bwà bwalu, ùndi mumanyè.

¹⁶⁸ Mpindyewu mbanganyi mwab'ewu bàdi bamanyè ne mèmè ndi mwenyi kunùdi? Elàayi byanza byènu muulu, bàdi bamanyè ne ncyèna mumanyè kantu nànsha kàmwè pa bwalu bwènu, elàayi byanza byènu muulu mu nseke yònsò yìbìdi ayi.

Mbanganyi mwab'ewu bàdi ne cintu kampànda cibì, anyi cintu kampànda cyùdi mumanyè ne mèmè ncyèna mumanyè kantu nànsha kàmwè pa bwalu abu? Swàyi nwèlè byanza byènu muulu.

Mpindyewu, mbifwànyine kwikala ànu menemene, kakùyì mpatà to kabyèna mwà kwenzekakù to bwà mèmè kumanya cintu nànsha cìmwè pa bìdi binùtangila. Mu ngaakwilù mukwàbò, dìbà adi, bìvwa bikèngela cìfuminè ku dibuulula kampànda dyà Nyumà.

Nèнку bu mùdìbi ne ndi munwámBILE malòlò wònsò aa, ne dilòlò edi ne, Yèyè kí mmufwè to; Yèyè ùdi kaaba aka, ne mmulayè bwà kwenza cintu cìmwècìmwè aci. Ne wàkalaya ne nekùlwe cikondo kampànda mu matùkù à ndekeelu, bilondèshile Maalàkì 4 ne bilondèshile Luukà Munsantu, bwà Wàmòna mwà kumwèneca cyàkàbìdi mu mmwènekèlu wa buntu munkaci mwà bantu Bèndè ne kwenza bintu bimwèbìmwè abi, ne kubuulula cintu cìmwècìmwè aci, cimanyinu cyà Maasiyà cìmwècìmwè aci. Mbanganyi bàdi bamanyè nàнку, nwènu babadi bàà Bible, nudi bamanyè ne aci m'Bulelèlà? Ambàayi ne: "Amen." [Disangisha didi dyàmba ne: "Amen."—Muf.] Bònsò bàdi ne cyà kwikala babadi bàà Bible.

¹⁶⁹ Mpindyewu, ndi mumanyè ne cìdi cyenyi kùdi bantu leelù ewu, kàdi ciikàle ànu Bulelèlà. Ki bwà cinyi kabàvwa bamanyè Yesù wa mu Nazalèètà to. Bàvwa bamanyè twitabàayi yàbò yà èkèleeziyà, kàdi kabàvwa baMumanyè to. Kàdi Yèyè wàkalwa ànu mùdi Bible mwàmbe amu; kàyi mmwena tèlòlòjì to, kàyi nsaserdòse to. Yèyè wàkalwa bu Mupròfetà, kàdi Bèndè Yèyè mwinè kabààkaMwakidila to.

¹⁷⁰ Mpindyewu, bu Nzambi mwà kushààla mukwàte ku Díyi Dyèndè, ne byòbì byenzèke ne mèmè. . . byòbì byènzeka ne

bikamatè pa muntu ùndi mumanyè, díbà adi nè—nèngàngatè muntu mukwàbò. Nwamònu's, ndi muswè muntu ùndi nciyi mumanyè to. Nènku ndi muswè bwà nùsambile.

¹⁷¹ Mpindyewu, tàngilàayi, kùvwà mukàji mukesè musangu kampànda mwikàle ne mateketa. Ùkaavwa mutùùle mfrangà yèndè bwà bangàngàbukà; kabàvwakù mwà kumukwàcisha to. Ki mukàji awu kwamba munda mwà mwoyi wèndè ne: “Bu mèmè mwà kulenga bivwàlù byà Muntu wàwa, nèngòndopiibwè.” Nudi bavùlùke bwalu-bulonda abu anyi? Ne pa nàнку bònsò bwàbò kuteetabò bwà kumufikisha ku dishàala paanyimà, kàdi wàkadifinda too ne mwàkalengàye civwàlù Cyèndè, kwalukila e kusòmba panshi.

¹⁷² Mpindyewu tèèlejàayi ne ntèmà. Ne pashìishe pààkenzàYe nàнку, pààkenzàye nàнку apu, Yesù kukènzakana e kwamba ne: “WàNdengì awu nganyi?”

¹⁷³ Mòna's, Peetèlò mùpostòlò awu wàkaMudyùla. Ùvwa mufwànyine kwikala mwàmbè cintu bu ne: “Mukalenge, kwambiku cintu bu nàнку to. Bantu nebèlè meeji ne kùdi cintu kampànda cipampàlámùke mu Wèwè amu. Bwalu, paWàkabàlòmba bwà kudyàbo mubidi Wèbè ne kunwà Mashi Èbè, bóbò bàkaadi bamanè kwela meeji ne kùdi cintu cipampàlámùke. Kàdi ng'Wèwè awu wamba ne: ‘WàNdengì awu nganyi?’ Mòna's, musùmbà mujimà ewu's wùdi wùKulenga.”

¹⁷⁴ Yèyè ne: “Èyowà, kàdi's ndi njingulula ne bukolè mbupàtùke mu Mèmè.” Acì's civwa ndilenga dyà mùshindù mushiilàngàne. Mpindyewu, muntu kanà yònsò ewu mmumanyè ne bukolè budi “dikàndà.” “Ndi mucyòke; bukolè mbuMpàtùke.”

Ki kukenzakanaYè pa batèeleji too ne mwàkapetàYe mukàji mutekète awu, ne kumwambila bwà disaamà dyèndè dyà mashi adi. Ki kudyùmvwayè mu mubidi wèndè ne disaamà dyà mashi adi dyàkiimana. Ncyà bushùwà anyi? Ki Yèyè kwamba ne: “Diitabuujà dyèbè dyàkusungidi.”

Mpindyewu, mwàkù wà cyena Ngelikà ùdi ne sozo, ùdi ùmvwija kakùyi mpatà to ne “musungidìibwe,” mu mubidi anyi mu nyumà, ànu cintu cimwècimwè aci. Yèyè “wàkasungila.” Yèyè ùdi—Yèyè ùdi Musungidi webè.

¹⁷⁵ Mpindyewu, pìikalàbi ne ùvwa n'Yèyè makèèlèlè awu, ne mùshindù wàkenzàYe awu, bwà kujaadika ne Yèyè ùvwa munkaci mwà bantu, Maasiyà mulaya awu; nènku ke mùshindù wàkaDìmanyishàYe mene awu's, ne mulayìibwe ku Bible ne, Yèyè neenzè cintu cimwècimwè aci mpindyewu; Yèyè kàvwà mwà—Yèyè kàvwà mwà kwenza cintu cimwècimwè aci anyi?

¹⁷⁶ Wèwè udi wamba ne: “Yèyè wàkamba bwà dyondopa dyà babèèdi anyi?” Èyowà's!

Beena Ebèlù, Bible ùndi mfùma ku dibala ewu, mmwambè ne: “Yesù Kilistò mpindyewu ke Mwakwidi wetù Munène

udi mwà kulengiibwa kùdì dyumvwa dyà mateketa ètù.” Mbanganyi bàdì bamanyè ne aci ncilelèlà? Bible ngudi mwambè nànkù. “Yèyè ùdì Mwakwidi Munène mpindyewu udi mwà kulengiibwa kùdì dyumvwa dyà mateketa ètù.” Dìbà adi piikalàbì ne Yèyè ùdì Mwakwidi Munène umweumwe uvwaYè musangu awu awu, mmunyi mùvwàYe mufwànyine kwenza maalù mpindyewu? Bìvwa bikèngela kwenzaYè mùshindù wùmwèwùmwè wàkènzàYe musangu awu awu, piikalàbì ne Yèyè ùdì Mwakwidi Munène umweumwe awu. Mpindyewu, nudi bafwànyine . . .

Mèmè ncyèna Mwakwidi wenù Munène to. Udi mufwànyine kundenga, ne mbifwànyine kwikala ànu bu kulenga bàyebè, anyi mwanènu wa balùme, anyi ní ncinyi cikwàbò, muntu mulùme kampànda.

¹⁷⁷ Kàdì lekèlaku bwà diitabuuja dyèbè dìMulenge, kàdì ùmonè cìdì cyènzekà. Mpindyewu, mèmè mwikàle musadidi wa Nzambi ne munwàmbìle Bulelèlà, Nzambi neàshindikè ne m’Bulelèlà. Nènku aci ncifwànyine kujaadika ne Yesù Kilistò ùdì ne mwoyi dilòòlò edi, mwimàne kaaba aka. Ncyà bushùwà anyi?

Mpindyewu, ikàlaayi ne diitabuuja, ànu luseke lùmwè ku musangu, luseke lùmwè. Ikàlaayi ne diitabuuja mwaba awu. Mbìmpè nshàlè ku cikòlòkolo eku, bwalu kabèèna mwà kungumvwa to.

¹⁷⁸ Muntu kampànda àtangilà kùdì Nzambi, àmba ne: “Nzambi, muntu awu kì mmummanyè to. Kì mumanyè kantu nànsha kàmwè pa mèmè to. Mèmè ndi mwenyi ànu wa menemene ewu kùdiye. Kàdì diitabuuja dyànyì dìKulengèku, Mukalenge. Ne Wèwè ngudi mumanyè cìdì kaciyì cyènda bìmpè kùndì, Mukalenge. Wèwè udi mumanyè byònsò bìdì bintàngila. Udi mumanyè ne mèmè ndi nganyi, byàmwomùmwe ànu m’Uvwà mumanyè ne Peetèlo ùvwa nganyi amu, byàmwomùmwe ne m’Uvwà mumanyè Natànàelà amu, ànu muWakamanyà cìvwà kaciyì cyènda bìmpè ne mukàjì wa disaamà dyà mashi àlwa munda awu amu. Ne muntu ewu ùdì ùngambila ne Wèwè udi ‘umweumwe awu makèlèlè, leelù, too ne kashidi.’ Dìbà adi, Mukalenge, enzàku bwà diitabuuja dyànyì dìKulengè.”

Nènku Yèyè mwenzè nànkù, ne kàyi ùpanga kuDijaadika Yèyè mwinè kaaba aka to, mbanganyi bàà kunùdì bààMwitabuuja ne mwoyi wenù wònsò; bu Yèyè mwà kucyènzakù nànsha ànu bwà muntu umwe, anyi bàbìdì, anyi bàsàtù, bwà—bwà bujaadiki? [Disangisha dìdì dyàmba ne: “Amen.”—Muf.] Nzambi ànùbènèshè.

¹⁷⁹ Mpindyewu, Taatù Nzambi, eci cìdì ànu menemene pambèlù pàà byanza byà muntu kanà yònsò ewu. Cidi ne cyà kwikala ànu citàmbe-mfùkilu cyà cikèmesha. Pa nànkù ndi ndòmba bwà Unkwàcishèku mpindyewu, Mukalenge. Ndi mu byanza Byèbè.

Enzàku naanyi mùdi Wèwè mumòne ne mbikùmbànàngàne amu. Mu Dìna dya Yesù. Amen.

¹⁸⁰ Mpindyewu, kanùbìndùluku to. Ànu ne kudipwekesha kwònsò, ne kaneemu kàbùngì amba ne: “Mukalenge, nènKukwàcìlè mudimu. Nènku aci neciikalè bulelèlè, bwà ne, bu mèmè mwà kulenga civwàlù Cyèbè, dìbà adi Wèwè wàndamwinakù ku muntu awu. Aci necinjaadikilè ne cidiye mwambè m’Bulelèlè.” Ncyà bushùwà anyi?

¹⁸¹ Mbanganyi bàkaadiku bamòne fòtò wa Bukènkè abu? Ùdi mu ditùnga mwònsò emu, myaba yònsò. Maalu à mamanya mmamwangàte mamukenkète, ne myaba yònsò. Mpindyewu, Yèyè ùdi kaaba aka mene mpindyewu; umweumwe Awu wàkamba bwà *Dibàkà Nè Difwà Dyà Dibàkà awu*, Yèyè umweumwe uvwa pa mukùnà awu, wakanyùkùsha tukùnà paanyimà pààpa, Yèyè umweumwe uvwa ku musùlu eku mu cidimu cyà 33 awu, umweumwe awu makèlèlèlè, leelù, too ne kashidi. Yèyè ùdi umweumwe awu.

¹⁸² Mpindyewu, kùdi muntu mukàjì, ne ùdi wìtaba mpindyewu ne cintu kampànda ncyenzèke. Bukènkè abu mbulembèlèlè ànu pamutù pèndè apu. Yèyè mmusòmbe ànu *mwab’ewu*, muvwàlè mùpìlù wa màyi à matàmbà, anyi cintu kampànda. Ncyèna mumanyè mukàjì ewu to. Ndi ngèèla meeji ne katwèna bamanyàngàne to. Aci’s ncyà bushùwà. Udi wìtabuuja ne Nzambi. . . Udi—udi mu lukèngelu lwà cintu kampànda, ne udi wìtabuuja ne Nzambi ùdi mwà kunsokolwela cidi lutàtù lwèbè anyi? Nènku Yèyè mwenzè nàнку, dìbà adi udi umanya ne neciikalè bukòlè butàmbe-mfùkilu, bwalu mèmè ncyèna mukumanyè to. Nènku nebikèngelè bwà kulwilacì ku citàmbe-mfùkilu.

Mbilondèshile ku cyùdi wèwè wela meeji ne ki mùdibi. Udi mwà kwangata luseke lwèbè pàmwè ne nsaserdòsè, kucibìikila ne “dyabùlù,” anyi udi mwà kwangata luseke lwà mwena kwìtabuuja awu kàdi kucibìikila ne “Nzambi.” Yònsò kanà ùdi wìtabuuja awu, ki kwàfùmina dyèbè difutu.

¹⁸³ Bu Nzambi mwà kumbuulwila lutàtù lwèbè, neùMwitàbè bu difuta dyèbè—dyèbè dya cibawu bwà lutàtù alu anyi? Ncyèna mumanyè cidi lutàtù alu to. Kàdi ndi mumanyè, ne nudi bamanyè ne, cintu kampànda cidi munkacì mwà kwenzeka.

¹⁸⁴ Kùdi. . . Mpindyewu, ndekèlè nkwambile mùdi udyùmvwà, ne dìbà adi neumanyè: didyùmvwà dyakàne, dilelelèlè dya luuyà, dya kalolo. Ndi muCitàngile buludi. M’Bukènkè, Bukènkè bwà kàlaabi-kabwicidile bulembèlèlè buumukila kùdi mukàjì awu.

Nènku inàbànzà ewu ùdi ùsaama cifù. Ncyenze bu byùja byà mùshindù kampànda, nàнку awu, mu cifù cyèndè amu. Kì ngwa munwemu to. To. Udi wa kule ne munwemu kì mmwòmò anyi? Ncyà bushùwà. Udi wa ku Wisconsin. Ncyà bushùwà anyi?

Bushùwà's. Mpindyewu udi mwondòpìibwe. Diitabuuja dyèbè dyàkusàngaji.

¹⁸⁵ Ngambilaayaku mpindyewu tǔng Udi mukàjì ewu mulengè. Ndi nendè kule mu ntàntà wa mètres makumi àbìdì ne àsàtù. Mmulenge Yesù Kilistò, Mwakwidi Munène awu. Nudi nwitabuuja nàнку anyì?

¹⁸⁶ Ndi mutàngìle mukàjì kampànda ùmwà mwakule nendè. Mukàjì ewu, ndi mumutàngìle buludì, bwalu ùdi ùsambila bikolè be bwà muntu mulùme kampànda. Mmungambìle muvwaye ne muntu kampànda . . . Kì mmungambìleku kantu nànsha kàmwè pa bwalu abu to.

Kàdì dìnà dyèndè m'Màndàmù Waldrop. Mmufùmìne ku Phoenix. Yèyè ùvwa mubiike ku bafwè, ki ngàngàbukà wendè kulwa ne nsèsà ya ku cyamu cya mìdimà ne kuleejaye kànsèrè mu mwoyi. Kufwàye mu mulongo wà babeèdi. Kùkaadi ntàntà bule kaayi uvwa bwalu abu bwenzèke, Màndàmù Waldrop? Kùkaadi bidimu dikumi ne mwandamukùlù, nènku's ki yèyè awu musòmbe dilòòlò edi, bujaadiki bùdì ne mwoyi. Ngàngàbukà wendè mmulwè mu disangisha adi, mulwe ne . . . Yèyè kwamba ne: "Mmunyi mùdì mukàjì ewu mwà kwikala ne mwoyi?" Kàdì's ki yèyè awu, kàyì ne cimanyinu nànsha cìmwè cyà cyòci aci.

¹⁸⁷ Mmutwàle muntu kampànda, ne ùdi munkaci mwà kumusambidila. Mpindyewu, ùdi ùpunga ne lufù, mwikàle ne disaamà dyà nsùkaadi. Mpindyewu, ki cìmwà mumanyè aci. Kàdì bu mùdìbi ne wèwè udi munkaci mwà kusambila . . . Udi mumanyè ne mèmè ncyèna mumanyè ne yèyè awu nganyì to, Màndàmù Waldrop.

¹⁸⁸ Yèyè ngwa ku Missouri, ne dìnà dyèndè m'Mukalenge Cooper. Ncyà bushùwà. Mpindyewu, udi witabuuja ne, udi mwà kwalukila kumbèlu ne kusangala's, mukalenge. Aci ncikutàngìle wèwè, bu wèwè mwà kuciitabuuja.

¹⁸⁹ Muntu mukàjì nyèyè ewu, ne ùdi ùsaama disaamà dyà mfwènkà, ntàtù mikòdyàkànàngàne. Yèyè kí ngwa munwemu to. Mmusòmbe lwà mu cisumbù cyà bantu mwàmwa, ànu lwà muntu *mwàmwa*. Ndi ntekemena ne ùdi ùpeta . . . Kì ngwà munwemu to. Ngwa ku Géorgie. Mandèmwàzèlè McKenny. Udi witabuuja ne mwoyi wèbè wònsò, ne witabuuja ne Nzambi neàkusàngàje anyì? Juukilà kuulu, pawikalà mwenyi kùndi ne aci cyòci cilelèlè. Yesù Kilistò ùdi ùkwondopa. Udi witabuuja anyì?

¹⁹⁰ Paanyimà pàanyì apa, kùdi muntu mulùme musòmbe paanyimà pàanyì. Udi munkaci mwà kulenga Nzambi. Kàdì bwalu bùdiku mbwà nè, ùdi mu dijinga, ùdi ne mwànà wa mu dibòkò udi ne disaamà dyà mwoyi. Ne mwànà wa mu dibòkò awu ùdi ne disaamà dyà lupeepà ku mwoyi wèndè, ke mùvwà ngàngàbukà mwambè. Ne dìnà dyà muntu awu m'Mukalenge Cox. Juukilà kuulu, Mukalenge Cox. "Ne Wàkambila Sarah cìvwaye wela meeji aci, paanyimà Pèndè apu."

191 Ànu lwà ku kajila kàà kuumukila kùdiye aku, lwà paanyimà apu ndambù, pàdi muntu udi kàyì mufùmine múnwemu to, kàdi wa ku Nouveau Mexique. Kacya ncitukù mwânji kumumônaku to, kacya bandela. Ndi mumutàngile buludi mpindyewu, ne yêyè ùdi paanyimà pàanyi. Ngwa ku Nouveau Mexique. Ne muntu awu ùdi ne mwànà wa bakàji udiyè ùtabaleela, ne mwànà wa bakàji awu ùdi ne cintu cìmutàcisha mukana mwèndè amu. Cìdi. . . Cìlākàlākà cyà mukana mwèndè ke cìdi ne lutàtu. Ne dìnà dyà muntu awu m'Mukalenge West. Udikù mwà kujuukila kuulu anyi, mukalenge. Ndi mwenyi ànu wa menemene ewu kùdiye, kàdi Mukalenge Nzambi neòndopè mwanèndè awu.

192 Udi witabuuja mpindyewu ne mwoyi wèbè wònsò anyi? Mbanganyi bàà kunùdi aku bàdi bìitabuuja mpindyewu ne mwoyi wènù wònsò? Mpindyewu, Yesù Kìlistò kèna umweumwe awu makèlèlè, leelù, too ne kashidi anyi? Udi uMwitaba mpindyewu bu Musùngidi webè anyi? Ela cianza cyèbè muulu. Udi umwitabuuja Yêyè bu Mwondopi webè anyi?

193 Mòna, muntu mulùme nyêyè ewu musòmbe kaaba aka, mucìbùkile panshì anyi cintu kampànda, mulààle pa kalààlù kàà dibùnya.

Nudi mwà kungumvwilakù ku cikòlokolo eci anyi? Ncyèna mukumanyè to. Wèwè udi ànu muntu mukàji mulàadika mwaba awu. Bu mèmè mwà kukwondopa, nùnkù's ndi mucyènzè. Ncyèna mwà kukwondopa to.

Èyo. Cìdi ànu muntu udi ucyònkómoka. Mwanèndè ùvwa mwondopiibwe.

Ncyèna mukumanyè to. Wèwè udi muntu mukàji, ne mèmè ndi muntu mulùme. Ewu's mmusangu wà nzànzànzà utùdi batwilàngàne mu lwendu lwètù, mùndi ncinka. Bantu aba. . . ? . . . aci cyànùfikishì. Bwà kwamba menemene, ewu mmusangu wènù wà kumpàla kaaba aka; mbacifùminakù ànu ku dinùbweja. Udi ufùmina ku ntàntà mule. Udi mubwikila kùdi mundìdimbì wà lufù. Udi ne kànsèrè. Kì ndicìbukila dyà panshì to. Nkànsèrè. Bangàngàbukà kabèena mwà kukwenzela kabìdi cintu to. Ncilelèlè. Ne wèwè udi mutwishìibwe ne udi ufwà; bangàngàbukà abu kabèena mwà kukwenzela kabìdi cintu to.

194 Musangu kampànda kùvwa beena nsudi bàsàtù basòmbe ku ciibi cyà Sàmaalèyà. Ke beena nsudi abu kwambabò ne: "Bwà cinyi tudi basòmbe kaaba aka too ne patwàfwà?" Bwà mabèèdi ònsò aa, bàfwà ne nzala, ne bàdya bânà bàà muntu ne mukwèndè. Kwambabò ne: "Twètù bayè ku citùùdilù cyà mwena lukunà, beena Suuliyà; bôbò batùshebèye, netùfwe, nànsha bishi. Nènku bôbò batùsùngile, netwikalè ne mwoyi." Ke kubwelelabò pa mpùngà awu. Nènku, ku diitabuuja, kabàkadisùngila ànu bôbò nkàayabò to kàdi musùmbà ujimà.

195 Mpindyewu, neufwe bu wèwè mwà kushààla mulààle mwaba awu. Kàdi kwèna mulombiibwe bwà kuya ku citùùdilù cyà


mwena lukunà to. Kàdi nudi babìikìdiibwe ku nzùbu wa Taatù,...?. . .

¹⁹⁶ Udi upùnga ne lufù bwà kànsêrè. Kwêna mwà kwikala ne mwoyi Nzambi kàyì mukukwàcìshe to. Kwêna wa mu cimenga eci to. Kwêna wa pabwîpì apa to. Udi mulwè ntàntà mule. Udi wa ku Milwaukee. Ncyà bulelèlà. Ncyà bushùwà. Mémè ngaakamòna cimenga aci. Ndi mucimanyè. Ncyà bushùwà.

Udi witabuuja anyi? Udi muswè kwitaba Nzambi mpindyewu bu Mwondopi webè anyi? Bu wêwè mwà kuswà, nànsha wêwè mutekète bishi, nànsha wêwè mulamàte mu bulààlu bishi, Ndi ngiitabuuja ne, mémè mu bwalu bwèbè adi, ndi mufwànyìne kuuu kuulu mu Dîna dyà Yesù Kilstò. Ne kwambula kalààlu aku ne kuya pambèlu, ne kwikala ne mwoyi bwà butùmbì bwà Nzambi. Udiku muswè kuntumikila, bu mupròfetà wa Nzambi anyi? Nànku juukàku ùye. Ũmvwè bìmpè! Kùkwàciki bwôwà to. Juuka mu kalààlu kàà babèèdi aku; Nzambi neàkusàngàjè. Nwamònu anyi?

¹⁹⁷ Muntu kampànda àmukwàtèku bwà àjuukè kuulu ne àpetè dikàndà. Udi witabuuja Nzambi anyi? Mulekèlè àpetè ndambù wa dikàndà; yèyè neàsangalè. Ki cyôci aci, Mwanèètù wa bakàji. Ki yèyè awu's, mu Dîna dyà Mukalenge Yesù!

Tujuukilàayi kuulu bwà kutùmbisha Nzambi. Yèyè ùdi umweumwe awu makèlèlèlà, leelù, too ne kashidi!

Ndàaku, ne Mukalenge Yesù Kilstò àkubènèshè. Ikàlà musàngàle. 

65-0221E Melekisedekè Ewu Nganyi?
Parkview Junior High School
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org